

## **ASO GAFUA, 24 MATI 2014**

*Na nofoia le Nofoa e le Fofoga Fetalai i le itula e 9.00 i le taeao.*

Tatalo.

### **ISI FAASILASILAGA A LE FOFOGA FETALAI**

**FOFOGA FETALAI:** O le agaga faafetai i lenei taeao fou ona e manatu o lea ua alafai mai i faguga lelei ma le soifua manuia le paia maualuga o lo tatou Maota i ona tulaga faalupe. Sa tatou alo i faiga malologa i le faaiuga o lenei vaiaso, e talitonu le faamoemoe ua tatou olioli livaliva ma tatou mapu i falematū i lenei aso ona o le alofa ma le agalelei o lo tatou Tapaau Sili i le lagi. Ua matauina ma le agaga faafetai le fotuai mai i faguga lelei i lenei aso fou aua le faaaauina pea o a tatou galuega tuua aemaise o le tatou polokalame ua uma ona faatulagaina.

E ofo alofa atu ma faatalofa atu i le paia ma le mamalu maualuga o le tatou Palemene i lenei taeao. E talitonu le faamoemoe ua ilo ve'a ma iloa taiao i lo tatou le faatasi ai ma le tama o le atunuu i lenei aso fou, ona o sailiga malosi aemaise foi o faiga malologa ona o le le atoatoa o le malosi o le tino. E i ai le agaga maualuga e le o tuua ia tama lo tatou Maota aua o lea e afifio mai ma tala mai aao o le paia i le Malo, Afioga i le Sui Palemia aemaise o le mamalu i Minisita uma o le Kapeneta ma Minisita Lagolago, aemaise foi o le atoa i tagi o sui usufono o lea Itu o le Maota i lau Afioga i le Taitai o le Itu Agai aemaise le paia maualuga o le Maota Fono nei. O lea e faatalofa atu i tulaga aloaia; afifio maia ma tala mai aao o lea ua tatou taunuu i a tatou galuega masani i lenei taeao.

E manatu o lea ua uma ona faataatia le tatou polokalame i le tatou usugafono lenei ma e leai se mea e tasi e suia o lea ua uma ona faataatia, ae na o nai mea laiti e fetuunai ona o tulaga ua tulai mai, o suiga lava mo mea lelei ina ia taatia i lagatonu mea uma ma le faamoemoe. E pei ona silafia le tatou polokalame lenei, e tasi le manulauti o le aveeseina uma o le tele o nisi o tuatuaanoa ma Lipoti e pei ona faataatia, aemaise foi o Tulafono ua tataua ma manaomia i totonu o le Faigamalo aua le faagaoioiga o galuega a le Kapeneta, aemaise le pulega o le Malo, ae faapea foi nisi o Tulafono Tau Faaofi ua faitau muamua ma faitau faalua. E tuuina atu ai le faaiuga a le Fofoga Fetalai, e le tataua ona tatou toe faatelelegese. E tataua ona i totonu o le tolu masina ua toe taunuu mai i totonu o le Maota Lipoti nei ina ia tatou alu i le au tafeloa, ae aua ne i toe faapututua ona o lea ua outou matau mai e 70 a tatou Lipoti. O se galuega e faigata foi ona toe tuituliaupu, a o lenei taeao e avatu pea le faamalosiua i le paia ma le mamalu o le Fonotaga ina ia outou onosai mai. O le agaga ma le faamoemoe ina ia faataunuu fuafuaga uma a le Palemene ona ua uma ona faataatia le tatou Order Paper, aemaise foi tulaga i

le fetuunaiga ma le Taitai o le Malo ma le Afioga i le Sui Palemia ina ia faasolo pea a tatou galuega.

Ou te tatalo atu ma le agaga faaaloalo i le paia ma le mamalu o lo tatou Maota ona ua outou silafia ua mafatia tele lo tatou atunuu i le tulaga i le faamai fofoga ua tatou i ai nei. E i ai le talitonuga ma le faamoemoe, ua alu le la vaiaso o tatou talanoa i mea tau puipuiga. Ou te talitonu, e sili le puipuia nai lo le toe tau togafitia. E tatalo atu ai i le paia ma le mamalu o lo tatou Maota, a i ai lava se sui usufono mamalu ua ia silafia ua aafia i le faamai fofoga, malie e le tatau ona tatou toe faatasi ona o le tulaga ua outou silafia le aafiaga tele ua i ai aoga i le pipisi o le faamai, ou te manatu ina ne i meaane ua aafia lo tatou Maota, ona toe toalia foi lea o a tatou galuega. O lea foi ua tatou vaai i le tulaga i sailiga malosi a le Taitai o le Atunuu, e sili lava le usitai. A saunoa mai loa fomai ua tatau ona malolo ona o tulaga i mea faapea, ua tatau ona tatou faia le tulaga e ao ona fai ina ia toe faafoi mai le malosi.

Ou te tatalo atu ai i le paia ma le mamalu o lo tatou Maota, a i ai se sui usufono mamalu ua aafia i le faamai fofoga, ia outou finagalo malilie e le tatau ona tatou toe faatasi i le Fono, ae e tuu atu le avanoa e fai ai se malologa, toe taliu mai toe faaauau fuafuaga a le tatou Palemene.

E fia molia le agaga faafetai ona o nisi o fuafuaga na le Fono ai le Maota i le la vaiaso ona o le faatasi atu i le tatalaina o nisi o mea taua i atinae a lo tatou atunuu, e faamalo atu i itu na aafia i le paia i le Faleiva ma Aiga Sa-Peseta, le mamalu ia Matautu o le muaau tutasi o Pule e Ono, ua malo faafetai i le itumalo. E faafetai ona ua tatou faatasi ai i lea aso taua e molimauina lenei atinae tele. E faamalo atu i tulaga aloaia i totonu o le Palemene i le oo atu o le Fofoga Fetalai ma sui usufono mamalu o le Maota e molimauina lenei galuega taua. E faafetai i tiuga ma faaaloaloga o le aso, o i le Atua manuia e tau ai mea ua faagaogaoina ona o le vaai i le afio atu o le Afioga i le Sui Palemia ma le mamalu o le Palemene ua maua ai lea aso.

E faapea foi lea itu o le motu i le Afifio o Aiga ma Tapaau aua Aiga, Safune ma Taulauniu, e momoli atu le faafetai tele i lau Afioga i le Minisita e tusa ai ma le tatou polokalame taua ua tatou molimauina ai le alofa tulai o nei Malo, ua tatala aloaia ai nei galuega taua aua lo tatou atunuu. E momoli atu foi le agaga faafetai tele i faaaloaloga ma mea uma i le tatou mafutaga i le va faafeagai ai ma le Malo, ia viia le Atua i mea ua saunia.

Ona o lenei vaiaso ua faatulagaina, e i ai le faamoemoe e faatulaga le Fono ma le talitonuga ina ia mafai pea ona tapuaaoina a tatou galuega. O lo o i ai le faamoemoe ma le manatu ina ia tuuina atu pea le faamoemoe ina ia tautuana o tatou taimi Fono. O le agaga ma le faamoemoe ia atoa le tatou numeru i taimi uma tatou te malolo ai aemaise foi taimi e toe faatulaga ai, ua ou manatu ai e tatau pea ona avatu i luma nei le talosaga a le Fofoga Fetalai.

I lea Itu o le Maota i lau Afioga i le Fofoga o Alii Lealailepule, ia tautuana ifo lenei Itu o le Maota i o tatou taimi amata. A ta loa lo tatou taimi, o le taimi lenei ua faatulagaina ai a tatou galuega.

E faapea foi i lea Itu o le Malu i lau Tofa Tialavea ona e manatu e le o auai mai le Fofoga o Alii i lenei Itu o le Maota ona o lo o aafia i mea faale-Ekalesia, ae ua ou talosaga atu i lau Afioga i le Alii Faipule ona e le i taunuu mai foi le isi sui o le Fofoga o Alii, Afioga Afoafouvale lua te vaavaalua mai i le tulaga lea ona o le taumafaiga ina ia faamaopoopo ina ia atoa pea le tatou quorum i taimi uma.

O nai faasilasilaga ia a le Fofoga Fetalai ona e manatu o lea o le a sii le vaatele i lenei aso, ae alo maia. E 70 Lipoti ia o le a tatou sagai e fai. O a fuafuaga uma ma le faagasologa o a tatou galuega, e manatu o le a tatou veloaso ma tatou apefoe faatasi e faataunuaina le faamoemoe ina ia oo atu i le aso ua taupoina, ua maea uma ma mama a tatou galuega.

O le faasilasilaga lea ma le faaaloalo tele.

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Sei tulai mai le sui usufono mamalu.

**Afioga Hon Palusalua Faapo II:** Ou te faafetai i le avanoa ua tuuina mai ma ou te tulai atu foi ma le faaaloalo ona o lea ua maea ona fana le ū i le vateatea i lo tatou va tapuia ma le Atua i lenei taeao fou. Ua logona foi le Maota aemaise Samoa e tusa ai ma le faamoemoe, lo tatou tama le Afioga i le Palemia ona o le falaefu ma le apulupulusia o tofaga e pei ona faimalaga atu ai i Niu Sila.

Lau Afioga i le Fofoga Fetalai, ou te faafetai i lau talosaga faapitoa aua o lenei mataupu, o se mataupu sa lagalaga ai foi le Maota i lea vaiaso talu ai. Ia avea ia au ma sui o lenei Vaega e momoli atu ai moomooga alofa i le faiga malaga a le Afioga i le Palemia ina ia maua le malosi, ia vave maua le soifua laulelei aemaise foi o le faletua e pei ona feagai ai ma le galuega i le tausiga o le Alii Palemia. Lau Afioga i le Fofoga Fetalai, ia alofa le Atua ia i ai se aso ia tatou toe feiloai i le manuia, ae viia ai lo tatou Matai Sili.

Ua ou tulai atu lau Afioga i le Fofoga Fetalai ona o lea ua faataoto au fuafuaga ma ua manino foi lau saunoaga e le o tuua ia tama galuega Faapalemene o lea e afio mai le Afioga i le Sui Palemia ma le Kapeneta ma lena foi Itu, aemaise foi o lenei Itu mo le faaauauina o a tatou galuega.

Ua ala ona ou fesili ona o le Lipoti lea a le Pule ma Suetusi Sili aemaise o le Lipoti a le Komiti Faapalemene lea na iloiloaina, ona o lea ua ou vaai atu i galuega o le aso ua leai atoatoa le Lipoti lea, a o lo o faatali le atunuu i le Lipoti lea. O le mea la lea o lea ou te fia fesili atu ai ina ia faamalamalama ona o lea e taputapuai mai le atunuu ma faatalitali mai i le Lipoti lea po o le a le tulaga o i ai.

**FOFOGA FETALAI:** O lea ua maua lou finagalo. O lea ua ou maua ma o lea o le a ou tali atu.

**Afioga Hon Palusalua Faapo II:** Pe sei faatali le Palemia sei foi mai ona faamalamalama lea?

**FOFOGA FETALAI:** Le Taitai o le Itu Agai, sa i ai lava le talitonuga tou te silasila lelei i le Pepa o Galuega lena e avatu. E le sao lau saunoaga ua aveese le Lipoti lea ma le Order Paper. Silasila lelei i le itulau lena e faatulaga i luga o galuega. Ua uma ona pasia e le Maota le tatou galuega. O le mea lea, aua le te'ite'i lau Afioga i le Taitai o le Itu Agai. E leai se mea o suia, o lena e faataatia ua uma ona tatou soalaupuleina, o le tatou Fono lenei e soalaupule ai mea uma, a o lena foi e te silafia e le o se mataupu e tago faatumutumu lima i ai le Palemene. O lena foi e te silafia o lea tatou te

tapuaia le alofaiva o le tama Palemia. O ia e aupito sili ona aafia i le mataupu lenei ona o le Minisita o le Matagaluega o lo o agai i ai a outou tuuaiga.

O le ala lea lau Afioga i le Taitai o le Itu Agai, toa mai le tai. O lea foi na e tautalagia tulaga i le la vaiaso ma le taumafai atu i tulaga i le tatou tatalo, e leai aua, aua tatou te fesiligia le Atua. O le faamoemoe tatou te tuu i luma o le Alii mea uma, a o fuafuaga ma le faapolokalameina, that is my discretion. O le pule lena a le Fofoga Fetalai e faatulaga ai le tatou Order Paper, a o outou ia sauni mai. E tele ma anoanoai a tatou Lipoti e tataua ona outou silasila ma tatou vaavaai i ai, a o tulaga e i ai ou te faasoasoava atu lava. O lea ua tautino i lenei aso, a oo atu foi i le Aso Faraile e faapena ona tatou fetuunai i le tulaga e sili ona lelei ma matagofie.

O le isi mea e sili ona taua, o lea tatou te sailiili malosi. O lea ua gasegase le toaina talu le naunau e tuli a tatou galuega. E vaai la ma le alofa, sa ou tatalo i le Atua ina ia faafoisia lou malosi i ou fofoga, ae faafetai i le Alii ona o lea ua tatou faatasi i lenei aso. O lea lau Afioga i le Taitai o le Itu Agai, faitau lelei a tatou pepa ona malamalama lea o le faatugaga o a tatou galuega.

**Afioga Hon Palusalua Faapo II:** Lau Afioga i le Fofoga Fetalai, o lea ua e saunoa e manino lava e leai se mea o suia. A le suia o lea ua tuu e faamulimuli? Afai o le faatofalaiga lea a lau Afioga i le Fofoga Fetalai, e momoli atu le agaga faafetai. A o le tulaga lea ua tulai mai ai o lea ua faamulimuli lava.

**FOFOGA FETALAI:** O lea ua maua lou finagalo le Taitai o le Itu Agai.

**Afioga Hon Palusalua Faapo II:** O lau faafetai lea e fai atu lau Afioga i le Fofoga Fetalai.

**FOFOGA FETALAI:** Vaai o lena e manaia le tuualalo a le sui usufono mo Falealupo?

**Afioga Hon Palusalua Faapo II:** O lea ua manino le faamoemoe o a tatou galuega.

**FOFOGA FETALAI:** Alaala mai i lalo le sui usufono. Taatia mai laia o lea ou te faasoasoina a tatou galuega. E le uma le fai aso o le Alii. O lea tatou te tapuaia le siiga gasegase a le Taitai o le Malo, o le atoaga lena o mea uma. E le o tuua ia tama o lea e afio mai le Afioga i le Sui Palemia e faaauau le 70 Lipoti. Silasila la i ai, tatou agai laia i mea na, a o nisi mea i tua atu, sei ou tuu atu foi le faamalamalama i le taimi talafeagai ona fetau lea o fola e pei o lea upu.

O le a tatou alo i a tatou galuega i lenei aso.

#### **TULAFONO TAU FAAOFI O APERENTISI 2014 – faitauga faatolu**

**Tofa Hon FONOTOE NUA FESILI PIERRE LAUOFO (Minisita mo Pisinisi, Alamanuia ma Leipa):** Faafetai i lau Afioga i le Fofoga Fetalai. Ou te faatalofa atu foi i lau Afioga i le Fofoga Fetalai ma sui usufono mamalu

uma o le Maota, ae a le tapuaiga a Samoa i lenei taeao. Malo faafetai, o lea foi ua tatou toe tauaofia i a tatou galuega e pei ona masani ai.

Ua ou tulai atu lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Aperenitisi 2014 i lona faitauga faatolu.*

*Faaluaina e le Minisita o Tupe.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O  
ELEELE, FUAGAFANUA MA LE SIOSIOMAGA 2014  
– faitauga faatolu**

**Tofa Hon FAAMOETAULOA LEALAI AULOTO ULAITINO FAALE TUMAALII (Minisita mo Punaoa Faalenatura ma le Siosiomaga):** Lau Afioga i le Fofoga Fetalai ae ou te ae out e le i faatu le lafo, ou te muamua ona ou fia piiama foi i le tatou faafetai i le Tapaau i le lagi e pei ona e muai sii i lenei taeao, faafetai ua Ia taitaiina mai lo outou soifua laulelei i lenei taeao ma ia maualuga pea Sona viiga i aso uma e le aunoa.

Ou te fia faaoga foi lenei avanoa e momoli atu ai lau faafetai i lou itumalo o lo o faafogafoga mai i le tatou taligamalo i le Aso Faraile na tea nei, e ala lea i le umusaina o le maota gasegase o le muaautasi o Puleono i Salafai i Vaipouli i Savaii, ma ua e faia lava mea silisili ua e manumalo ai foi, ua tatou galulue faatasi aua lava le agai i luma ma le atinaeina o tatou tagata faapea foi lo tatou itumalo.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2014 i lona faitauga faatolu.*

*Faaluaina e le Minisita o Tupe, Minisita mo Aoga, Taaloga ma Aganuu, Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** E faasilasila atu ua maea ona faagasolo le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2014 i le Palemene ua potopoto ma ua faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O  
PULE O VAEGA FANUA 2014 - faitauga faatolu**

**Tofa Hon FAAMOETAULOA LEALAI AULOTO ULAITINO FAALE TUMAALII:** I le ava tele ou te tulai atu ai ou te faatu le lafo, *Ina ia*

*faitauina nei le Tulafono Tau Faaofi o Teuteuga o le Tulafono o Pule o Vaega Fanua 2014 i lona faitauga faatolu.*

*Faaluaina e le Minisita mo Tupe, Sui Palemia, Minisita mo Aoga, Taaloga ma Aganuu, Minisita mo Galuega, Felauaiga ma Atinae Eseese ma le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**FOFOGA FETALAI:** E faasilasila atu ua maea ona faagasolo le Tulafono Tau Faaofi o Teuteuga o le Tulafono o Pule o Vaega Fanua 2014 i le Palemene ua potopoto ma ua faapea ona pasia le Fono Aoaofaitulafono.

#### **TULAFONO TAU FAAOFI O TEUTEUGA O LE TULAFONO O FESOOTAIGA 2014 – faitauga faatolu**

**Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi):** I le agaga faaaloalo i lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fesootaiga 2014 i lona faitauga faatolu.*

*Faaluaina e le Minisita o Tupe, Minisita mo Faatoaga, Faleoloa o Faatoaga ma Faigafaiva, Minisita mo Punaoa Faalenatura ma le Siosiomaga, ma le Minisita mo Galuega, Felauaiga ma Atinae Eseese.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**FOFOGA FETALAI:** E faasilasila atu ua maea ona faagasolo le Tulafono Tau Faaofi o Teuteuga o le Tulafono o Fesootaiga 2014 i le Palemene ua potopoto ma ua faapea ona pasia le Fono Aoaofaitulafono.

#### **TULAFONO TAU FAAOFI O TEUTEUGA O LE TULAFONO O SOLIGATULAFONO TAU LEOLEO 2014 – faitauga faatolu**

**Afioga Hon SALA FATA LISATI PINATI (Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei):** I le ava tele ma le faaaloalo ou te tulai atu ai lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Soligatulafono tau Leoleo 2014 i lona faitauga faatolu.*

*Faaluaina e le Minisita o Tupe, Minisita mo Aoga, Taaloga ma Aganuu, Minisita mo Punaoa Faalenatura ma le Siosiomaga, ma le Minisita mo Galuega, Felauaiga ma Atinae Eseese.*

**FOFOGA FETALAI:** E faasilasila atu ua maea ona faagasolo le Tulafono Tau Faaofi o Teuteuga o le Tulafono o Soligatulafono tau Leoleo 2014 i le Palemene ua potopoto ma ua faapea ona pasia le Fono Aoaofaitulafono.

**TULAFONO TAU FAAOFI O TEUTEUGA O LE TULAFONO O  
FEFAATAUAIGA, MEA TAU PISINISI MA ATIINA A'E O  
ALAMANUIA 2014 – faitauga faatolu**

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fefaatauaiga, Mea tau Pisinisi ma Atiina A'e o Alamaniua 2014 i lona faitauga faatolu.*

*Faaluaina e le Minisita mo Faamasinoga ma Pulega tau Faamasinoga ma le Minisita o Tupe.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**FOFOGA FETALAI:** E faasilasila atu ua maea ona faagasolo le Tulafono Tau Faaofi o Teuteuga o le Tulafono o Fefaatauaiga, Mea tau Pisinisi ma Atiina A'e o Alamaniua 2014 i le Palemene ua potopoto ma ua faapea ona pasia le Fono Aoaofaitulafono.

**TULAFONO TAU FAAOFI O TEUTEUGA O LE TULAFONO O  
SONE TAU FOLAUGA I LE SAMI 2014 – faitauga faalua**

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai i le toesea ai o le Afioga i le Palemia ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Sone Tau Folauga i le Sami 2014 i lona faitauga faatolu ma ou te fia tautala faamalamalama i ai.*

*Faaluaina e le Minisita o Tupe.*

**FOFOGA FETALAI:** Tulai mai lau Afioga i le Sui Palemia e saunoa faamalamalama i le Tulafono.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai o se Tulafono Tau Faaofi puupuu leni Tulafono Tau Faaofi ma e mafua lava i le Toe Teuteuina o uiga o upu. O lo o faamatalaina ai le uiga o le faailoga o le maualuga o le sami ma le faailoga o le maualalo o le suasami. Ua teuteuina foi i leni Tulafono Tau Faaofi le upu, "tulaga saogalemu ma lelei o le Malo," ua tuuina i ai upu, "nofo lelei ma le malupuipua." E faapea foi le suia o le upu, "faigafaiva" i le upu "EEZ" po o le tatou Sone foi lea faapitoa.

O Teuteuga la nei lau Afioga o Teuteuga e manaomia mo le toe faamanino atili o tatou Sone ia tau Folauga i le Sami, ina ia o tutusa ma tulaga ma

faauigaina o upu pei ona ua i ai nei onapo. Ia ma o le faauigaina la o le Sone tuaoi ua aofia ai vaega o le sami ia o lo o i tua atu ma le tuaoi i le sami o le atunuu, faamatalaina i le Tulafono o pito taitasi uma e faapea e 24 maila tautai lona mamao mai le pito e sili ona lata mai o le laina faavae po o le base line i totonu o le Sone tuaoi. Ma o totonu la o le Sone lea e mafai ai e le tatou Malo ona faatino so o se malosiaga e mafai ai e so o se faiga talafeagai ina ia taofia ai le solia o le tatou Tulafono, Tulafono Faatonutonu e faasino i tiute, ia o mataupu tau tupe femalagaiga ia ma isi lava tulaga faapena, faatasi ai ma faasalaga mo latou e solia ia lenei Sone.

E pei o le tulaga lea lau Afioga i le Fofoga Fetalai, o nai Teuteuga pupuu ia mo lenei Tulafono, ma le faaaloalo.

**FOFOGA FETALAI:** Malo, faafetai saunoa faamalamalama i lau Afioga i le Sui Palemia e ala i lenei Tulafono ua faatulai mai i le tatou Maota. Ua avanoa le Maota mo se felafolafoaiga, e manatu foi o lenei Tulafono sa tatou talanoaina i le tatou De-Briefing sa faia i le Aso Gafua na tea atu nei, ma e manatu na saunoa manino ia le Matagaluega aemaise foi sui usufono mamalu na auai mai – ma e talitonu ua manino ma malamalama le faatulagana o le tulai mai o lenei Tulafono.

Ia o le a avatu pea le avanoa i le sui usufono o lo o tulai mai le sui usufono mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu. 3):** Faafetai lau Afioga i le Fofoga Fetalai mo le avanoa, faafetai atu i le Afioga i le Sui Palemia mo le avanoa e faamalamalamaina ai foi le Tulafono. E talitonu foi le agaga lau Afioga i le Fofoga Fetalai o se Tulafono taua. Pau nai vaega lau Afioga i le Fofoga Fetalai e fia maua ai se malamalamaaga po o se tuualalo foi i le tapenaina o lenei Tulafono.

Muamua lau Afioga i le Fofoga Fetalai, o le tulaga lea i le faauigaina o upu. E faafesiligia lau Afioga i le Fofoga Fetalai, ona o lea ua faailoga mai le vaega maualalo po o le fuaiupu lea i le vaega high tide mark ma le low tide mark. O le eseeseaga lau Afioga e fia maua i ai se faamalamalamaga ona o aafiaga, e talitonu foi lau Afioga o le tele o vaitaimi nei pei ona silafia e afioaga ma alaafaga aemaise lava i nuu foi ma aiga e tu mafafaga o latou fanua, o le tele o vaega eleele ua tele ina tafia i le 20 i le 50 tausaga e le gata o afa ia a o le tele foi o lologa ma le siisii o le tai. Po o le faauigaina la o ia upu, o taimi uma lava e tafea ai le vaega eleele lea, o le a sii foi ia le vaega lea e oo i ai le low tide po o le high tide i le taimi o lo o i ai nei. O le aafiaga lau Afioga, ona pei ona tau matau atu i le Tulafono, afai e faatinoina lea vaega, lona uiga e fua lava lo tatou coastal area i tausaga uma e manaomia. Pe faaaogaina ia se base line se tausaga po o le tausaga na sainia ai e Samoa le Tulafono lea le In Cross po o le Tulafono o le Sami le faaaoga lea o le base line. O le aafiaga lau Afioga a oo ina faapea ua tafia eleele i le suasami ma suia ai ia le ua tele ina aveese ai nisi o vaega o aiga, afai la o i ai se finagalo o aiga ia e toe tanu ia vaega o vaega eleele sa i ai muamua ua manaomia le pemitia mai le Ofisa o le Siosiomaga. Ua tele foi ona faaaogaina i le Tulafono, o eleele ia ua i lalo o le sami ua tataua ona alu i totonu o le Malo, o le aafiaga la lea.

E le gata i lea lau Afioga i le Fofoga Fetalai, o le tele foi pei ona maitauina foi i se faamalamalamaga a le Matagaluega, o le taua lea e naunau i ai lo



tatou atunuu, ina ia mamao atu i fafo lo tatou le EEZ ma isi vaega uma ia, afai la e tailua taitolu tausaga, o se faataitaiga lau Afioga o le itumalo o Gagaemauga Nu. 3, ou te masalo ua maua e nisi o afioaga ua silia ma le selau mita i le last twenty years, ua silia ma le eleele ua tafia. O lona uiga la o eleele uma ia ua faatulagaina nei, o le....

**FOFOGA FETALAI:** Ia sei fesoasoani atu lou uso a polofesa i la oulua mataupu. Tulai mai lau Afioga i le Minisita mo Punaoa Faalenatura ma le Siosiomaga.

**Tofa Hon Faamoetaulao Lealaiauloto Ulaitino Faale Tumaalii:** Faafetai lava i lau Afioga i le Fofoga Fetalai mo le avanoa. Leai ona o lea ua taua le itumalo o Gagaemauga Nu.3. O tulaga uma ia o lea e lavea uma i totonu o le poloketi foi lele o le faasaoina o le siosiomaga ma le tulaga o le puipuia, resilience against climate change, O le mea la lena o lea e i ai uma i le tulaga lea e le o faapea la na o le Gagaemauga Nu.3 lava o afaina, o la e afaina uma lava le atunuu, ma o lea foi e agai i ai le Matagaluega e vaavaai i most critical areas aua e le o lava vaegatupe o lo o suetupe ai i le tulaga foi lea e aumai lalo o vaegatupe ia a Malo faava o Malo for climate change e aumai e fesoasoani i tulaga ia. E fuafua lava la i le tulaga foi lea o le tele o le afaina, ae o lo o auauai atu lava ina ia faamalieina uma tulaga ma puipuia tulaga uma lava e pei ona taua e le sui usufono mamalu. Ma lou faaloalo lava.

**FOFOGA FETALAI:** Malo faafetai fesoasoani mai i lau Afioga i le Minisita mo Punaoa Faanatura ma le Siosiomaga. Tulai mai le sui usufono mamalu.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. E faafetai atu foi i le Afioga i le Minisita. Ae o le a ou see mai loa la e faaoga le faataitaiga o lou itumalo i le afioga o Fasitootai ma Vailuutai faaagai atu i Satapuala. Lau Afioga sa ou taumafai atu i le 20 tausaga ua silia ma le 20 i le 50 mita le tele o le vaega eleele lea ua tafia. i le taimi nei la, a faapea e faaogaina, o le ala fesili lea, po o le a le low tide mark lea e baseline ai tatou. Afai o le taimi nei, o lona uiga o la ua toe fua mai i tua le tatou high tide ma le low tide mark. O lona uiga, o vaega eleele uma ia na tafia i le 20 tausaga, o lea ua own e le Malo. O lona foi la o le aafiaga i lea tulaga, e le gata ina manaomia le pemita i le Ofisa o le Sioiomaga i eleele ia pe a fia tanuina e aiga, ae o le aafiaga foi i le faanaunauga lea, o lona uiga ua toe mei mai i totonu i le isi 20 mita po o le 100 mita foi i vaega eseese o le tatou EEZ, ma atili ai lava ona laitiiti. Afai e faaogaina se tulaga baseline po o le 57 i le uluai taimi na fai ai areas o le tatou atunuu po o le tausaga foi na sainia ai le Tulafono, atonu o eleele la ia e mafai ona tanu e aiga, ma o latou foi nei e ona nei eleele. O se faataitaiga lau Afioga o tua i togatogo, e tele ina fesui ai le tau ma aafiaga ia ou te talitonu lau Afioga e manaomia ai se toe iloilo lelei, po o fea tonu le mark e faaoga e tatou.

**FOFOGA FETALAI:** Ia o lea ua maua le finagalo o le sui usufono mo Aana Alofi Nu.3, o lea foi ua saunoa malamalama le Afioga i le Minisita e ala i polokalame ma mea ia e faatulaga atu. Ina nei faoa i le ta lou finagalo, i

le tatou faatusatusaga o le 20 mita ma le 100 mita, e manatu tatou te seusilasila foi i le tulaga o aafiaga. O le 20 ma le 100 mita o se matua ogaeleele ua aafia tele. Ae ou te talitonu o le aafiaga lea ua tatou i ai, o lea tatou te molimauina lava mea ua aafia, ou te lagona e le tatau ona ova atu i se 20mita po o se 30 mita mea ua aafia mai le 20 tausaga i lea vaitau. Ua tele tele le tatou estimate e 100mita. E leai se ogaeleele o Samoa ua ou alu atu ua 100 mita se aia o se sami, a o lea ua manino, malie lau Afioga i le sui usufono mamalu, o lea ua saunoa malamalama le Minisita mo Punaoa Faanatura ma le Siosiomaga o lea ua agai le tatou polokalame e le gata i le puipuiga, a o lea ua i ai. O le fesili foi lena sa agiga i le tatou briefing. Ou te manatu e le o i ai Tuivalea i le Malo, o lea lava e faagasolo galuega, o fea le mea e aafia, e iloagofie lava le mea o lo o i ai o tatou fanua muamua ma fanua ua aia. Ae lafo atu pea i le tulaga o lo o i ai ni fetuunaiga, a i ai ni itumalo ua aafia tele, ona manatu lea ua lagona ma talafeagai le mea lea e te atugalulu i ai.

Se i tulai mai se tasi o sui usufono mo Aana Alofi Nu.1, Afiog Hon Leaupepe Toleafoa Apulu Faafisi ona sosoo ai lea ma le Minisita.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Malo faafetai mo le avanoa. Ua ou manatu e ao ona fai se upu i le mataupu lena, ona talu ai e le faapitoa manu ia tasi i nisi o afioaga o lo o aafia i lena lava faafitauli o le aia o le gataifale, leaga o lo o tupu tele foi i le nuu lena, ma so o se nuu lava. A o le agaga e tau avatu, pe le mafai ona fetuunai, aua o le mea o lo o tu ai nei ina ia manino i le faafofoga mai a le matou foi itumalo po o Fasitoota, le mea o lo o tu ai le galuega a le EFKS, le fale o le faifeau ma le hall, ua tuu tai o la e ilogagofie lava i tai i le papa la e tuu mai tai, o i ina sa mafua ai ona maua le ogaeleele lena e taua o Lepisi, sa afaina ai se tasi o tamalii o le atunuu ona o le tulaga lea, ona faaigoa lea ia Lepisi le fanua lea. Ae molimauina ua see mai i uta le aia lea, ona e i ai pine e mafai ona faamaonia ai le tulaga lea, common sense. E moni lava i le Tulafono Tau Faaofi, a ia fetuunai, aua o lea o le a tanu nei ave i le Malo, lisi i le Malo, a o le tanu e tanu e le Ekalesia po o le tagata e toatasi, ona o le manatu e toe faafoi i o i le mea sa i ai, a o lea la o le a uma ona tanu ona aumai lisi ma totogi tupe a le Malo, pe le mafai ona fua i sina fua foi lele e o atu le Ofisa faapea, oi e sao la outou, o le a fua la i o le tou.... Ioe, pei e faapena se lagona leaga e i ai le isi tolotolo, leaga o upu a le atunuu e faapea, "E iloga lava tolotolo e fai i ai upu a tulafale, e iloga foi tumutumu mauga e saunoa i ai tamalii ma aiga." E faapena. A ua aia la i le sami ae tuu mai i le tatou Tulafono Tau Faaofi, e pulea e le Malo. Na o se faamanatu...

**FOFOGA FETALAI:** Malo. O lea foi ua maua le finagalo o le sui usufono. E pei lava foi ona ou taumafai atu i le taimi ua sola, o lea ua saunoa mai le Minisita, o le Tulafono lava ia, o le mea e limataitaiina ai ma faatonutonu, a o lo o i le Matagaluega, e le faapea a o atu lava e le fetau i le Tulafono ona apalai lea, ae a o atu foi e silasila ma vaavaai e pei ona ou taumafai atu, ina nei meaane ua ova tele le tatou estimated. A o Tulafono Tau Faaofi, o lena tou te silafia, e le ova atu i le 100 pe 200 mita seiloga o le 300 tausaga talu ai, ona oo lea o i tatou i ituaiga aafiaga na o ni Tsunami se 40 ma ni afa se fia sefulu ona aafia lea. Ia ae sei tulai atu le Minisita mo Galuega, Felauaiga ma Atina Esee, ona avatu ai lea o le avanoa i le Minisita mo Punaoa Faanatura ma le Siosiomaga ma le Sui Palemia.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese):** Lau Afioga i le Fofoga Fetalai, e faatalofa atu foi i lenei taeao. A o le mataupu e pei ona... o la e agai le Matagaluega o le Punaoa Faanatura ma le Siosiomaga e mataitu vaega ia. O le tulaga o le siisititia o le tai i luga ma lalo, o lo o i ai tulaga e pei o le Global Positioning System, o le GPS, o le vaega lena a satellite o lo o mafai ona faatino ai le vaega lea, e link i isi atunuu ona faatino lea e le Matagaluega o la e i ai tight cage e faatino i le taamilosaga atoa o Upolu, e mafai ona mataitu ai suiga o le tau i le taimi e siisii ai ma le taimi e pe ai le tai. A tatou mataitu lenei vaiataimi i le siisii o le suasami lea ua i ai, ua matua faafitauli tele. E le na o Samoa. E feoloolo Samoa o lea e na ona... a o atumotu foi nei coral islands o motu amuamu ua matua tele le aafiaga.

O le tulaga i mea ia o aafiaga foi nei i rosen, i le taimi e tafia ai, a oo ina talosaga se tanu, ona o atu lea o le Ofisa o Fuagafanua, e taumafai lava e adopt le mea sa i ai le sami muamua, ona amata mai lea i ina faaopoopo i le mea ua tanu e le aiga, o le vaega lena e faailoa mai. Ae taumafai lava i faamaumauga la e i ai ina ia mafai ona iloa le mea sa gata ai le sami ma le suiga ua i ai, ona faaopoopo lea i ai ma le tanu. O vaega na o la e mataituina e le Matagaluega, e le o i ai se mea faaletonu i le Matagaluega, e le o i ai se mea o faaletonu i tulaga faatonu. O le Tulafono Tau Faaofi ia, na o se mea e faamautu ma tapue ai polokalame o lo o faagasolo. A o le tulaga lea, o galuega uma o lo o aafia i le tulaga lenei. Ma le faaaloalo.

**FOFOGA FETALAI:** Malo faafetai fesoasoani mai i lau Afioga i le Minisita mo Galuega, Felauaiga ma Atinae Eseeese. Malie le Taitai o le Itu Agai sei avatu le tali a le Malo ona tulai atu lea e fesoasoani mai. E lelei lou onosai mai ona malamalama lea.

Tulai mai lau Afioga i le le Minisita mo Punaoa Faanatura ma le Siosiomaga...

**Tofa Hon Faamoetaulua Lealaiauloto Ulaitino Faale Tumaalii:** Faafetai mo le avanoa i lau Afioga i le Fofoga Fetalai. E taua tele le mataupu lea e pei ona aumai e se tasi o sui usufono mamalu mo Aana Alofi Nu.1, Afioga Hon Leaupepe Toleafoa Apulu Faafisi. Ma i totonu lava o faamaumauga a le Matagaluega, o lea vaiataimi ma lea vaiataimi e pue ai lava le faafanua o mea nei o coastal areas i le tulaga, e faaoga ai pei ona taua e le Minisita mo Galuega, Felauaiga ma Atinae Eseeese, o le tulaga lea e faaoga ai le GPS. Ma sa i ai le case faapea na finau ai i le tulaga, ou te le taua le vaega tonu sa finau i luga o le tulaga o le loa e faapea o le loa e finau mai le isi itu faapea o la e na fau i luga o le mea na tanu e latou, ae finau atu le isi vaega, o le loa o lea e tu i luga o le fanua faaleaganuu. Ma na toe sue lava i tua tulaga o faafanua nei, ma aumai ai loa le faafanua o le mea sa i ai muamua le coastal area, ma le mea lea ua i ai nei, o i ina na maua ai le tali, lea na ave ai loa i le Faamasinoga o Fanua ma Suafa aumai ai loa le tali, o lena la nasoalaupule ai le tulaga ma maua ai loa le faaiuga filemu o lenei mataupu. Ae sao lava lau saunoaga, e le taitai ona oo i se 50 mita le tulaga o le fesuaiga i le tulaga o le tau po o le 100 tausaga talu ai, i le vaavaai lea a matou ia i ai i tulaga o faafanua ia e aumai, aua o lo o ou aamia lava ma aumai i totonu o lou Ofisa

ma ou tilotilo i ai i le tulaga foi o le faatinoina o galuega a le Matagaluega. Ma lou faaloalo lava.

**FOFOGA FETALAI:** Malo faafetai saunao i lau Afioga i le Minisita mo Punaoa Faanatura ma le Siosiomaga. Tulai mai lau Afioga i le Sui Palemia.

**Tofa Hon Fonotoe Nuafesili Pierre Laufo:** Lau Afioga i le Fofoga Fetalai, ou te manatu o lea ua malamalama ma manino le mataupu, e le o se mataupu tele foi. O le mea lea e tupu, o lea ua tatou silafia uma le suiga o le tau ua oo mai, siisii o le tulaga o le suasami, ma o mea uma nei e mafua mai i fafo i atunuu tetele, e i ai falegaosi ma fale e gaosi ai mea eseese i atunuu tetele, ua faapena ona release ai kasa oona. O lea la e mafua ai ona aafia le tatou ozone ma atili ai ona mafanafana le lalolagi i le kelope. A outou silasila la i ata tiga ma Televisi, o i lava i le itu i matu ma le itu i sauté, o le north pole ma le south pole, ua liusuavaia aisa tetele lava na e i luga i ina, o le mafuaaga lena o lea ua siisii ai i luga le tulaga o le tai. O lona uiga la o le faamatalaga, e leai lava ma se mea a se isi o tatou e mafai ona taofiofi ai mea na, vagana ai ni atunuu tetele ua taumafai e fai ni faiga e taofiofia ai a latou falegaosi oloa ma mea tetele faapena ina ia taofiofia ai i lalo mea o kasa oona lea e mafua mai i a latou falegaosi oloa o lo o i atunuu mamao ma atunuu i fafo. O le mea la lena ua oo mai ai ia tatou ua aafia ai ma tatou ma lofia ai ma nisi o vaega o fanua lea e aafia ai motu ia o Tuvalu, o Kiripati. Masalo o le isi 25 tausaga ua matua lofia atoa Tuvalu ia i le suasami. O mea faapea, o lea e taumafai e taofiofi ona o lea ua saunao manino le Afioga i le Minisita mo Punaoa Faanatura ma le Siosiomaga, o lea ua i ai tatou polokalame faagaioi, ma o polokalame ia o lea e galulue ai le lalolagi atoa, o faalapotopotoga tau siosiomaga, e taumafai e taofiofia tulaga ia i mea o adaptation programmes ma mea o resilience programmes ma mea faapena. O lea e tele polokalame ia e mafua ai ona fai taligalu ma tulaga faapena o lea e taumafai e faaleleia.

O le tulaga o fanua ia ua lofia, o la e lava e manino le ownership po o le pule o fanua, afai lava o fanua umia saoloto, o la e maua faafanua ma tulaga faapena, taoto mai i le Matagaluega ma le Afioga i le Minisita, o latou na e silasila ma fetuunai tulaga uma, e le o se mea e faapopoleina ai. O le toe tulai atu lea lau Afioga i le Fofoga Fetalai, ae tuu mai loa le tatou fesili.

**FOFOGA FETALAI:** Malo. E manatu ua malamalama le finagalo le sui usufono mo Aana Alofi Nu.3. Ia, e talitonu foi le faamoemoe o le a le faia se faafinauga. E taua le faatulai mai leaga e au i le tauola au i le fagota i tatou uma. O lea foi na saunao manino se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi i le tulaga na i ai, o lea ua agiga i le Kapeneta ma le Afioga i le Sui Palemia, ia lafo laia ia latou. O lea foi ua saunao manino le Minisita mo Galuega ma Felauaiga Eseese, ia, o lea ua outou silafia o le isi profession lea a le Minisita mo Galuega, is a qualify surveyor, ua uma ona tusi le faafanua o Samoa ma ua uma ona mau i faafanua o le lalolagi, e le mafai ona toe suia ia mea, a faapea e tatou te toe tuituliaupu, ia tatou te toe agai e aumai le original mapping ma le original survey ona tatou iloa ai lea. A o atugaluga e taua le manatu ma le faafofoga atu a le Palemene ma outou manatu faaalua, a i ai ni mea e fesiligia o le tofa ma le faautautaga tataua lena a le Matagaluega latou te o atu e faamanino ma

faamalamalama ia kolokolo kaua e iloa pisa le gakaifale ua iloa kolokolo o le akuguu. Ia o le atugaluga lea ua manatu ma malamalama. Tulai mai le sui usufono mo Faasaleleaga Nu. 2, sosoo ai lea ma le sui usufono mo Faleata Sisifo, tulai mai lau Afioga i le sui usufono mamalu.

**Susuga PAPANII LIO FAAVAIVAIOMANU TAEU MASIPAU (Faasaleleaga Nu. 2)** Malo faafetai.

**Afioga Hon Palusalua Faapo II:** Lau Afioga i le Fofoga Fetalai, e faamalulu atu lava i le sui usufono lea.....

**FOFOGA FETALAI:** Malie, sei tuu atu le avanoa faapea e le fia tulai mai o lea ua manino le mataupu.

**Afioga Hon Palusalua Faapo II:** E pau lava le mea ua ou toe tulai atu ai lau Afioga, ona o lea e lei maea le saunoaga a le sui usufono a o lea ua faaumaina mai, o le mea lena, aemaise ai o lea ua e faasaoa le tele o mea ia na laga, aua e tataua ona faaauau pea le saunoaga a le sui usufono e lei uma lona taimi, ua umi o e faauilavea lau Afioga.

**FOFOGA FETALAI:** O lea ua saunoa mai ua lulu mai le ao o le sui usufono mo Aana Alofi Nu. 3 ua uma lana saunoaga. O fea la...o le a e uunaia lava le sui usufono mo Aana Alofi Nu. 3 ua le fia saunoa? Faafofoga mai o le faamalamalama lea e alu atu i Minisita. E le taofia lau faamalamalama le Taitai o le Itu Agai, if I had to explain, I had to explain – ma e a ou saunoa loa i le tulaga o le faamalamalama, e manino, ae aua e te taumafai pea e uunai mai le sui usufono mo Aana Alofi Nu. 3 o la ua malamalama le sui usufono mo Aana Alofi Nu. 3, le sui usufono, ia aua e te naunau ta tele ne i te i ua e agai tele i fautuaga ia e avatu ma sese ai lou finagalo.

Tulai mai le sui usufono mo Faasaleleaga Nu. 2.

**Susuga PAPANII LIO FAAVAIVAIOMANU TAEU MASIPAU:** Faafetai i lau Afioga i le Fofoga Fetalai mo le avanoa faapea foi le faafogafoga a le paia o le Maota. Lei e laititi lava sina...e fia malamalama i lenei Tulafono, o lo o i ai suiga i le faaupuga o le faiga faiva agai i le EEZ. Atonu e aoga foi lau fesili i lau Afioga i le Sui Palemia o lea foi e faafogafoga le atunuu aemaise foi o le aufaifaiva, lona uiga la o le faiga faiva lea ua sui i le EEZ, lona uiga o le Sone foi lele ua 200 maila le faatafafa foi lele mai le eleele matutu. Ia ae aoga foi le faafesili atu ina ia malamalama foi, aua o le tele lava o le aufaifaiva e le malamalama i le 200 maila lea ma le sone lea e saoloto ai lo tatou atunuu. O le faafesili, o le a le malosiaga o le tatou 200 maila lea i le tatou sone e faatusatusa la ia Tutuila lele e latalata mai, ia ma nai isi foi motu o Tonga ma...po o le a la le malosi o le tatou 200 maila lea, ina ia fagogota foi o tatou faifaiva ua latou malamalama lelei i le mamao ma le va ma isi atunuu ia e tau lata mai? O le tasi lenei vaega e maua foi le tamaoiga e fesoasoani i le atunuu, aemaise foi o mea o vaa foi lele e soona fagotaina lo tatou gataifale i totonu o le 200 maila lea, ia po o a mai ia na tulaga foi o le tamaoiga ua seasea foi o ta toe faalogo ua fai foi sina leva e lei toe faalogo o molia mai ni vaa fagota, po o le a se tulaga o i ai po o faatino

pea lea faaaogaina ma le faamalosiga o le Tulafono ina ia fesoasoani mai foi i a tatou tupe maua, aemaise foi o le soona fagotaina o le tatou gataifale i totonu o le 200 maila lea o le sone o lea ua ou vaai atu i le suiga lea ua aumai, lea ua sui faiga faiva i le EEZ? Ma le faaaloalo.

**FOFOGA FETALAI:** Malo, sei malie lau Afioga i le Sui Palemia, sei faamaea mai le sui usufono mamalu lea toe tasi lea e totoe ia ona aumai loa lea o le tali a lo tatou Malo. Tulai mai le sui usufono mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai lava lau Afioga i le Fofoga Fetalai, atonu e toe maua foi se avanoa o le Afioga i le Sui Palemia, e faigofie le fesili a le Afioga i le sui usufono mo Aana Alofi Nu. 3 lea e tau tulituliloa o lea e tau tulituliloa le base line e fua foi i ai le tele o le tatou sone lea tuaoi ma le EEZ, aua e tataua ona i ai se mea e draw ai le base line e fua i le mamao mai totonu o le fesuisuiaiga o tolotolo po o matafaga i le aafiaga i le tau. E tataua lava la aua o le sau tele i totonu o mea nei, o le me'i mai foi na i totonu o le base line, a o le mea lea e tatalo atu ai, po o le a le silasila a le Malo i se mea e tusi ai le base line lea, e fua i le tuaoi mai le amataga, ona tamau ai lea i ina, po o le a la le femeiaiga o le coastal line, a o la ua i ai le laina lea a tatou? Pei o le mea lena o lea e fia tulituliloa atu ai lea e fia malamalama ai nai sui usufono. Ma le mea lea o le suiga lea e sau i le Fuaiupu 5 lea ua sui mai ai upu ia, 'tulaga saogalemu ma lelei o le Malo,' aveeseina ae sui i upu ia, 'nofo lelei ma le malupuipua,' ou te fia malamalama pe aisea ua toe fesui ai, o le a se ogaoga o i ai le eseesea o upu nei, a faitau i ai, o lena lava e sagatonu upu muamua pe a tilotilo i ai.'

O le isi vaega o le vaega lena mulimuli i le aveesea o 'faiga faiva' ae sui i le 'EEZ,' o lena ua i ai le faa-Samoa o le EEZ lena e manino mai le suiga lena o Sone Faapitoa tamaoaiga, ae le tuu pea i ai le faa-Samoa. O le isi vaega, po o le mea ua aveese le faiga faiva ona ua i ai fuafuaga foi a atunuu i mea foi ia o isi suesuega faale-tamaoaiga e faia i totonu o le sone lea, e le afaina la lea tulaga, aua o mea taua pei ona saunoa le sui usufono mamalu ua mavae atu, o i e tua i ai tatou ma le tele o atunuu i le tele o le tamaoaiga, ia e ao foi ona tatou naunau pea i ai e faalautele laitiiti aua o tatou lea e aupito sili ona laitiiti, e le gata ina taumafai e faatumau le tele, ia a o nisi o faiga faasolitulafono o faatino ai i totonu po o le a se galuega a le Malo o fai i ai e taofiofia ai ma faaitiitia, a o le a foi sa tatou galuega o faia i lena taimi o faiga faiva, e faatupulaia ai a tatou tupe maua mai totonu lava o lea sone? Ia ma le faaaloalo lava faafetai.

**FOFOGA FETALAI:** Malo faafetai. O lea ua maea sui usufono e saunoa lau Afioga i le Sui Palemia, tulai maia e talifuaitau ona tuuina atu lea o le tatou fesili.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, ia o le tatou tulaga lava lea o le laina faavae o le base line ona o lo o tumau lona tulaga o lo o taoto ai, ma e le o i ai se tulaga foi lea o fesuisuia ai i le taimi nei, e fua atu ai le tatou 200 maila tautai po o le EEZ, tatou Zone faapitoa la lea. Ae o tulaga na e pei ona silafia, a tatou agai i sasae, ia o lea e i ai Tutuila, a tatou agai i matu o lea e i ai Tokelau ma Kiribati, a tatou agai atu i le itu lea i sisifo, o lo o i ai Fiti ma isi motu ia

Farani, a tatou toe o foi i sauté o la e i ai Tonga. O lona uiga e fuafua faapena ia tulaga, o lenei foi mataupu ua leva ona tau negotiate ia tatou laina ia tau le 200 maila tautai po o le tatou EEZ. O le faigata lena o le tulaga lea e i ai tatou i Samoa nei. A o uiga o upu ia pei ona saunoa i ai se tasi o sui usufono, ia e leai lava se eseese tele e pau lava le mea lea o le agaga o le Tulafono e faamanino atili ia upu ia ua aumai e toe sui i ai ia isi upu fou ia. A o tulaga na o lo o faamalosi pea ia tatou puipuiga o tatou Sone ia mea tau surveillance, aua tupe maua mai i tulaga ia o faiga faiva. Pei o tulaga na lau Afioga i le Fofoga Fetalai.

**FOFOGA FETALAI:** Tulai mai le sui usufono mamalu mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, e fia maua se fesoasoani mai le Afioga i le Sui Palemia po o le Minisita mo Faatoaga ma Faiga faiva, e le o po se lilo o lea e faitau pea tatou i faitioga mai nusipepa i le fagotaina faasolitulafono o tatou gataifale, o lea foi ua tele le afaina o nisi o tatou tamalii ua leva ona fai lea atinae o faiga faiva o lea ua tapunipuni o latou faleia ona e faapea ua leai ni ia ua tele ina ave e vaa tetele ia mai fafo. A o le mea lea e fia maua se malamalamaga, po o le a tonu le galuega o faatino o faia, ina ia prevent ina ia taofiofia ai nei solitulafono, a o le a foi se galuega o faia ina ia faatupulaia ai le tatou tamaoaiga mai vaega nei, lea mai le tatou ogasami lea? Ma le faaaloalo lava.

**FOFOGA FETALAI:** Malo. Ia....

**Susuga Papalii Lio Faavaivaiomanu Taeu Masipau:** Ia o sina mea laititi lava lea lau Afioga i le Fofoga Fetalai, leaga e le o atoa foi le tali mai a le Afioga i le Sui Palemia.

**FOFOGA FETALAI:** Ia tulai mai le sui usufono mamalu.

**Susuga Papalii Lio Faavaivaiomanu Taeu Masipau:** O lona uiga la e oo mai lava i le taimi nei e negotiate ma isi atunuu nei e lei maua se tasi, pe o le uiga la o lo o tau faatali sei....

**FOFOGA FETALAI:** O lea ua maua le fesili. Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** Lau Afioga o lea sa manino lau fai atu o le tala lea sa ou fai atu i le tatou Sone lea, e tele tausaga ua tuanai o taumafai e negotiate mai, a o la ua pei ua taoto i se tulaga foi lele o la ua i ai se maliega. Pei o le vaega lena lau Afioga.

O le tulaga o faiga faiva ma le tulaga o le ia, o le ia lea tatou te talanoa i ai o le ia foi lele lea e tau o le high migratory fish po o le tuna, tele ina feoai foi lele a oo i le taimi o le tau malulu ua faapena, a oo i le taimi o le tau mafanafana ia ua ese foi le itu o le Pasefika e agai i ai, a oo lava la i le taimi ua tau leai foi se ia e agai mai i inei i totonu o le tatou Sone, ia o le mea foi lena e tulai mai, e faaleai foi se ia a nai faifaiva e maua, pei o le tulaga lena lau Afioga.

**FOFOGA FETALAI:** Malo faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Sone Tau Folauga i le Sami 2014 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi o Teuteuga o le Tulafono o Sone Tau Folauga i le Sami 2014 i le Komiti o Mataupu tau le Va i Fafo, Fefaatauaiga ma Tupe Maua mo le iloiloina ma toe lipoti mai i le Fono Aoao i le Fonotaga o Iuni 2014.

### **TULAFONO TAU FAAOFI O TEUTEUGA O LE TULAFONO O LE FAAFOEGA O LAFOGA 2014 – faitauga faalua**

**FOFOGA FETALAI:** Tulai mai lau Afioga i le Minisita mo Tupe Maua.

**Tofa Hon TUILOMA LAMEKO (Minisita mo Tupe Maua):** Lau Afioga i le Fofoga Fetalai faapea ia sui usufono mamalu o le Maota, e tulai atu e faaali se manatu ina ia mafai ona faamalamalamaina ai ia le suiga o le Tulafono lea ua i luma nei o le Laulau a Fono.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Lafoga 2014 i lona faitauga faalua ma ou te fia tautala faamalamalama i ai.*

*Faaluaina e le Minisita o Tupe.*

**FOFOGA FETALAI:** Ia tulai mai lau Afioga i le Minisita e saunoa faamalamalama i le Tulafono.

**Tofa Hon TUILOMA LAMEKO:** Lau Afioga i le Fofoga Fetalai, pei ona silafia i le vaega o le Tulafono o Teuteuga o le Tulafono Autu o Mea tau Lafoga o Tupe Maua i le 2012, o lea la ua i ai la le Teuteuga na aumai e fa ni vaega o lo o taua i le Teuteuga lenei o le Tulafono Autu i le 2012, o lea la ua suiina nei i le 2014. Ma i lau Afioga i le Fofoga Fetalai, o le vaega taua o lo o taua i le vaega lua, o le taua lea i totonu o le Tulafono le taua o faamaumauga faalilolilo e tuuina atu i totonu o le Ofisa o Lafoga ina ia faaeteete ia e o lo o faigaluega mo le tuuina atu faalauaitele o tulaga o mea o faamatalaga faalilolilo, e le tataua ona iloa e se isi e vagana lava le Ofisa o Lafoga ona o le fuafuaina o mea tau lafoga. O lea la o le isi lona vaega taua o le Teuteuga ina ia faailoa atu le taua tele, le taua o faamatalaga faalilolilo ma faamatalaga manino e tuuina atu i totonu o le Ofisa o Lafoga, ina ia iloa o ē e aafia uma ai ia matua tulai i se tulaga faaeteete ona latou faalauteleina ia tulaga o faamatalaga e le tataua ona faailoaina i tagata lautele.

Ma le vaega lona tolu, o lo o i ai foi i totonu o le suiga o le Tulafono, le noatia ma le fuafuaga o lafoga aemaise lava mea foi nei e i ai a tatou tupe maua foi nei e tau o withholding tax lea e 10%, ina ia mautinoa lelei i le faaupuga i le mea o lo o tuu mai ai i totonu o le Tulafono, ina ia manino lelei ia le tulaga ia i mea nei o tupe teu faaagaaga aemaise tuu mai faaagaaga ma e mafai ona toe faafoi i le aufai lafoga.



I le vaega lona tolu o lo o tele agai lava le faamatalaga o le suiga o le Tulafono i le taua o le tuuina atu o faamatalaga o lo o i ai foi i totonu i i i le vaega lea e tolu, le taua ona lesitala uma tagata employers, tagata foi nei o lo o faafaigaluegaina ia tagata e tatau ona lesitalaina uma, ona o le mafuaaga o i e fuafua agai i ai le fausiaina ma le tuuina atu o lafoga.

Ma le vaega mulimuli le vaega lona fa lena o lo o taua ai e pei ona ou taua le tulaga taofiofi lelei ma le faamauina lelei i pepa a le Ofisa atoa foi ma le Matagaluega. E oo foi i le isi Matagaluega o Fuainumera Faamauina, ia aua nei avea le tulaga lena ma mea e soli ai le Tulafono e tuuina atu ai ni faamatalaga e le tatau ona faailoina faalauaitele mo i latou e ono totogiina ni lafoga. Lau Afioga, o le faamalamalamaga lea i le Tulafono Tau Faaofi.

**FOFOGA FETALAI:** Malo faafetai saunua i lau Afioga i le Minisita mo Tupe Maua. Ia, e tatala atu le avanoa i le tatou Maota i se sui usufono e fia saunua.

Ia, tulai mai lea se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG (Palota Taitoatasi):** Lau Afioga i le Fofoga Fetalai, e momoli atu le faafetai i lau Afioga mo le avanoa. Na o le tulaga lava lea i mea tau withholding taxes lea na taua e le Afioga i le Minisita ona e fia faamalamalama le tulaga lea, ona ua maitauina le tele o nisi o Faalapotopotoga ua le aoina lafoga nei pe a totogi atu ni galuega faatino e konekarate. O le mea la ou te fia malamalama ail au Afioga, po o le a sao lava la le aafiaga aua e i ai lou talitonuga i mea nei o lafoga taofiofi, withholding taxes, e tatau ona taofi mai se vaegatupe o galuega nei e faatino faakonekarate ona tuuina atu lea e le Falapotopotoga i le Matagaluega mo Tupe Maua. A fai la se return a le konekarate, ona le iloa ai loa lea i ina pe refund pe toe totogi se isi lafoga. A o lau maitau, e i ai Faalapotopotoga lea e le o taofia lafoga ia, o lea la e faafesili atu ai i le Afioga i le Minisita, po o le a sao lava le tulaga o le Tulafono Tau Faaofi lea. Aua i lou talitonuga, e tatau lava ona taofi lafoga ia, ae le totogiina atu i se konekarate o lo o faatinoina se galuega a le Malo. Ma lou faaaloalo lava.

**FOFOGA FETALAI:** Malo. Ia, sei tulai mai le Afioga i le Minisita mo Tupe Maua.

**Tofa Hon TUILOMA LAMEKO:** Lau Afioga i le Fofoga Fetalai faapea sui usufono mamalu o le Maota, o lea ua saunua tonu lava le sui usufono i le tulaga moni. O le withholding tax, e tipi mai le taimi lea a o faigaluega... ona taofi lea e le Malo tusa po o le 10% o le withholding tax. E taofi la, ae a faapea e uma le tausaga, ona fai lea o annual accounts e alu uma ai mea ia. E mafai la ona toe refund le tupe lena, e mafai ona toe refund le withholding tax lea pe a uma ae le tausaga ae fai returns a kamupani ae show mai o la e loss le kamupani lea e ona le tupe lea. O lona uiga la, e mafai ona toe refund le tupe lea o le mea lea e tau o le withholding tax, e mafai ona toe faafoi agai i le tagata. E sao lelei le saunoaga ua maitauina, e tele kamupani o lo o latou faia le mea lea o le le tipiina o le withholding tax, e tatau ona tipi. E tatau ona tipi i lalo o le Tulafono, e tatau ona tipi ma le faamoemoe la, a uma le tausaga ae

fai le return a le kamupani, ae ono aliali mai ai o la e i ai le tupe mama e mafai la ona toe ask for refund. Ma le faaaloalo.

**FOFOGA FETALAI:** Ia, e i ai se isi e toe fia saunoa? Tulai mai lau Afioga i le sui usufono mo Faleata Sisifo.

**Susuga Hon PAPALIITELE NIKO LEE HANG:** Lau Afioga i le Fofoga Fetalai, mo lou avanoa mulimuli pe toe i ai se isi ou avanoa?

**FOFOGA FETALAI:** Ia, pe a faapea o se mea e te le o malie ai i le faamalamalamaga.

Malie le sui usufono mo Faleata Sisifo sei toe tuu atu le avanoa i se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG:** Faafetai atu i lau Afioga i le Minisita mo Tupe Maua i le faamalamalamaga malamalama i le tulaga lea na ou fesiligia. A o lau fesili lea e tau avatu, po o le a la le aafiaga o le Faalapotopotoga lea ua le taofia le lafoga lea. E pei o le agaga lena o le fesili, ona o lea e maitau atu i le saunoaga a le Afioga i le Minisita mo Tupe Maua, e i ai tulaga ia ua totogi atu i konekarate le lafoga lea sa tatau ona taofi mai. E pei o le agaga la o lau fesili, e solitulafono la le Faalapotopotoga? Ma lou faaaloalo lava.

**FOFOGA FETALAI:** Tulai mai le Minisita mo Tupe Maua.

**Tofa Hon Tuiloma Lameko:** O lena ua sao lelei lava. E tatau ona taofi le tupe lea, e le tatau lava ona le faia i lalo o aiaiga o le Tulafono. O le isi la vaega lena lea e tau faamalosiia ai ina ia mautinoa e tipi le tulaga lea aemaise lava o le vaega o le tax e tatau ona totogi agai i le Malo. Ae na pau lava le mea, o nisi o kamupani e le tau fai atua e fiu lava e taumafai foi lea e uma loa lava ona pay atu le amount foi lea e claim e ia e pay, ona le toe tipiina mai lea o se lafoga. Ma le faaaloalo.

**FOFOGA FETALAI:** Malo. Ou te manatu ua manino le faamalamalamaga a le Afioga i le Minisita ma le autu tonu o lenei Tulafono Tau Faaofi, o le faamalosiina o le tipiina i le Malo o le withholding tax. Ma e manatu afai na i ai nisi mea na tulai mai i fatia ua sola ma aso ua alu i le tulai mai o le Tulafono Tau Faaofi lenei, e faamanino ma faamalamalama ai le tipiina, seiloga e uma le tausaga fai au annual reports, ave silasila i ai le Matagaluega ma iloilo e tagata ua i ai le tomiai faapitoa, a tatau ona refund, refund, a tatau ona toe totogi, o le mea lena e faatulaga. A o le faamalosiiga, e manatu foi ua i ai aiaiga o lenei Tulafono Tau Faaofi ina ia faamalosiia ona o se tasi lenei o tax e tatau ona limataitaiina ai le tatou Malo e maua ai foi nisi alagatupe.

Tulai mai le sui usufono mo Faleata Sisifo ona sosoo ai lea ma se tasi o sui usufono mo Salega, Afioga Afualo Wood Uti Salele.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai, faafetai foi i le Afioga i le Minisita i lenei Tulafono Tau

Faaofi taua ua tuuina mai, aemaise foi o le Matagaluega i le tau aoina mai o tatou seleni aua le faatinoina o galuega a le Malo.

O le vaega e fia fesili ai lau Afioga, o le vaega lea o le faamaumauina o tagata faigaluega, employees, po o le a le metotia o le a faaaogaina e le Matagaluega, ae faapefea foi ona maua uma. Aua e i ai nisi o tagata e fai a latou ave taxi po o i latou foi e fai ni o latou maumaga, faafaigaluega ai nai tagata foi nei e o i lea aso ma lea aso. O le a le category, ituaiga vaeveaga foi lea e vaevae ai lea vaega.

O le malupuipua o faamaumauga, tasi lea vaega taua tele ina ia saogalemu i latou o lo o teuina faamatalaga tau lafoga a tagata lava ia i totonu o le Matagaluega. Faafetai i le vaega lea. Ae tasi le vaega lea e fia fesili ai, e fia malamalama ai foi lau Afioga i le vaega 9(a) o le suiga i le mea lea e fai mai o le soligatulafono matuia, o lo o faapea mai ai, o le sala e faatoa matuia pe a faapea e sala tupe e le itiiti ma le 50 iunite po o le faafalepuipui e le itiiti ma le lima tausaga. O lea la e fesili ai i lau Afioga, o lona uiga e le matuia le faasalaga faafalepuipui fa tausaga agai i lalo po o le fa tausaga ma masina, sei vagana ua oo i le lima tausaga ona faatoa tuu lea i lalo o soligatulafono matuia ona o lea e pei ua tele tele le va o tausaga faafalepuipui pe a fua i sala tupe. Ia, o le mea lea e fia malamalama ai i lau Afioga, ma le faaaloalo lava.

**FOFOGA FETALAI:** Malo. Malie lau Afioga i le Minisita, e faigofie foi lau tali mai, sei maea uma atu saunoaga ona tasi ai lea o le taimi e tali ai.

Tulai mai se tasi o sui usufono mo Salega, Afioga Afualo Wood Utu Salele.

**Afioga AFUALO WOOD UTU SALELE (Salega):** Faafetai i lau Afioga i le Fofoga Fetalai. E tasi lava se vaega lea e fia malamalama ai i le Afioga i le Minisita mo Tupe Maua, ae faafetai mo le teuteuina o le Tulafono Tau Faaofi ona o lea e foliga mai e 10% le lafoga lea e taofi mo tagatanuu o Samoa ma kamupani foi iinei i Samoa ae 15% o kamupani mai fafo. Ia po o le a sou finagalo ae toe silasila i ai i le le faaaogaina o lea vaega aua e tau siiiisii i luga kamupani nei mai fafo, ae ave se avanoa i ai ina ia mafai ona tauva iai a tatou kamupani.

Ma le isi vaega e silasila i ai lau Afioga, pe fia se tupe o faaagaaga e tatau ona maua mai i le Tala Faatatau o le Tupe ona e taua tele le sao o le vaega lea mo le Tala Faatatau o le Tupe, ia mautinoa ai ua feoloolo se tupe ao mo lenei tausaga.

O lau fesili lea ma le faaaloalo lava. Faafetai.

**FOFOGA FETALAI:** Malo faafetai. Ia, tulai ai se tasi o sui usufono mo Vaimauga Sisifo, Tofa Lefau Harry Schuster.

**Tofa LEFAU HARRY SCHUSTER (Vaimauga Sisifo):** Faafetai i lau Afioga i le Fofoga Fetalai mo le avanoa. Lau Afioga i le Minisita mo Tupe Maua, e le taumate ia te au e i ai se mafuaaga aoga o le Tulafono Tau Faaofi. Na pau lava lou atugaluga, i lalo o le tatou Faavae la e faapea mai ai, “So o se tulafono lava e tatau ona tutusa lona aafiaga i tagata uma i le tulafono, ma e aafia ai foi la ma le Malo.” O le popolega lea e ia te au, o lea ua faapito le Tulafono Tau Faaofi lea na o le Malo lava e mafai ona talosagaina le information lea mai le Inland Revenue, ae a tatou tagai i ai, o le mataupu e faatatau i le Faamasinoga. I tulafono lava latou a Faamasinoga po o le

solitulafono po o le tulafono foi lea o aitalafu, Civilian Law, e tutusa uma lava le aia a tagata i lalo o le Tulafono lea i le faiga o le Faamasinoga. E le faapito le Faamasinoga faapea ona o le Malo, e tele atu la le aia o le a ave i le Malo ae laitiiti le tagata lea e molia po o le tagata lea i se Faamasinoga ma le Malo i se mea tau lafoga po o tulaga faapea.

O lau la vaai, o lea ua ave e le Malo le aia lea, ae faapefea la le tagata taitoatasi. A faapea o au lea o le a ou sue ina le Matagaluega o Tupe Maua faapea ua ave le malosiaga lea i le Matagaluega o Tupe Maua e fai ai i le Loia Sili e aumai le Tulafono, e tatau foi la ona aumai ia te au le aia lea faapea o lea ou te sue ina le Matagaluega o Tupe Maua, ona o le Faamasinoga lea e fai o le va o au ma le Matagaluega o Tupe Maua. Ae a faapea la e le aumaia le aia lea ia te au, ua le tutusa la le Faamasinoga lea ua fai, ua malosi le isi itu ae vaivai le isi itu. E tatau lava ona tutusa le Tulafono i tagata uma. O lau faatusatusaga lea e faapea mai o se Faamasinoga Sili, Civilian Case, pe fia le aofai o le tupe e totogi e le Faamasinoga? E foliga mai la a faapea o la e tulituli e le Matagaluega o Tupe Maua le tagata i le lafoga e totogi, ua tele foi la le latou malosiaga i le Tulafono Tau Faaofi, ona o lea e mafai ona faaoga le Tulafono lea e aumai ai le information manaomia. Ae a faapefea pe a faapea, aua e le faapea e sao uma tagata uma. A faapefea pe afai e sese le Ofisa ae sao le tagata faipisinisi lea na te sue ina le ofisa? A o le a laitiiti la lona avanoa ma le tupe e mafai ona ia tulitulia ona o lea e le maua e ia le information lea i totonu o le Ofisa e mafai ai ona faamaonia e tele le sese o le Ofisa na ala ai ona... e tatau ai foi la ona tele le tupe e mafai ona ia tulitulia.

Lau Afioga i le Minisita mo Tupe Maua, o se manatu vaivai lea i le Tulafono Tau Faaofi e pei ona faataatia.

**FOFOGA FETALAI:** Malo faafetai.

Ia e maitau atu e le o toe i ai se isi sui usufono... Tulai mai le Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, e puupuu foi se sao e tusa ai ma lenei Tulafono Tau Faaofi. Faafetai i lau Afioga, faatoa ou faafetai lava lea i se Teuteuga o se Tulafono Tau Faaofi, ona ou te talitonu o lo o i ai le agaga o lau Afioga i le Minisita ma le Matagaluega e tau aoao mai tupe e tau fesoasoani i le Tala o le Tupe a le tatou Malo. O lea la ua toe aumai le Teuteuga lea, e i ai lou talitonuga, o le faamoemoe ina ia mautinoa o lo o usitaia e kamupani ma konekarate le latou matafaioi, o le 10% lea e fuafua e le Malo i le taimi mulimuli pe taofi pe toe faafoi foi mo tupe maua a si o tatou atunuu.

O le fesili la lau Afioga i le Fofoga Fetalai e ala atu i le Minisita mo Tupe Maua, po o i ai ni kamupani ua faamaonia lea ituaiga solitulafono, po o i ai ni kamupani, po o le a foi la le mea ua faia i ai, aua e le o mautinoa lona tulaga i ni kamupani e le o usitaia le tulaga lea, aua o lea lava e silafia na aumai foi i le Lipoti a le Suetusi Sili, o lo o i ai lava kamupani e le o usitaia le tulaga lea. Ae atonu o le a avea le Teuteuga o le Tulafono Tau Faaofi ma mea e taofiofi ai le tulaga lea ina ia mautinoa o lo o maua e le Malo tupe e mafai ona faagaioia ai le Malo i lana Tala Autu o le Tupe. E pei o le fesili lea.

O lona lua lau Afioga, o lo o taoto le talosaga a le afaipisinisi ona o le tele tele o lafoga o lo o feagai ma i latou, ioe. A o lenei taimi pei ona silafia le tele o le faaletonu o lo o feagai nei ma nai pisinisi nei ma le Chamber of

Commerce i le tau faafetauia o tau o lo o feagai ma i latou. O lo o i ai la le latou talosaga ina ia silasila le Malo mo se fesoasoani i le lafoga o lo o latou totogia. O le mea lea lau Afioga i le Fofoga Fetalai e tuusao atu i le Minisita mo Tupe Maua, po o le a le tulaga i le talosaga lea, aua o le upu moni, e pei lava o la outou mau tuusao mai, o le faiga paaga a le Malo ma le private sector, faiga paaga. A o le tulaga lea e tulai mai nei, e le o se faiga paaga, ua tauva le Malo ma le private sector i a latou fuafuaga lea e fai nei. Ua tauva ma ua oo ina faaletonu ai isi pisinisi a le private sector. O le mea la lea lau Afioga i le Fofoga Fetalai, e ao ona silasila le Malo mo se fesoasoani a le private sector aua o i latou ia o lea e faafaigaluegaina le toatele o le atunuu, ae a faaletonu mai nei, vaea tagata faigaluega ma e matua tele le faaletonu o le tamaoaiga o le atunuu i lea tulaga.

O le mea lea lau Afioga i le Fofoga Fetalai, e tatalo atu i le Afioga i le Minisita ma le Malo ina ia silasila i ai i tulaga ia. Ma lou faaaloalo lava.

**FOFOGA FETALAI:** Malo fafetai lava. Ua toe o le avanoa mulimuli lau Afioga i le Minisita ona tali ai loa lea.

Tulai mai le sui usufono mo Faasaleleaga Nu.4.

**Afioga PESETA VAIFOU TEVAGA (Faasaleleaga Nu.4):** Faafetai mo le avanoa lau Afioga i le Fofoga Fetalai.

Ua ou kulai aku e avaku siga sao e fesoasoagi ai i le makaupu lea e pei oga aumai e le kele o sui usufogo mamalu iga ia magigo ma malamalama le kulaga lea i le 10% lea o le withholding tax oga o lea e kaua ai mea gei o kokekalake. Ou ke malamalama lelei i le kulaga lea oga o lea ua uma oga faakaakia kaiala i lea Makagaluega ma lea Makagaluega a le Malo. E pei foi oga kaua e le Kaikai o le Iku Agai le iku lea i kamupagi e le o kokogia a latou withholding tax po o le a le mafuaaga. E pei o lou lava kalikoguga, e le pau i le kamupagi le mea lea. Afai lava o le kokekalake o lo o faakigo se galuega a lea Makagaluega ae le kipia mai e le Makagaluega le lafoga lea, o loga uiga o lega e pau i le Makagaluega. O le Kulafogo lena ma le kaiala e pei o galuega a le LTA ia e i ai gei, o lea ua magaia ma mauku. A oo ina o le a fai le claim, e sau ua aveese le withholding tax ma aveese le retention. O mea lava ia e aveese e Makagaluega a o le i oo mai le kupe i le kamupagi.

Ma lou faaaloalo lava.

**FOFOGA FETALAI:** O le a tuu atu pea le avanoa le sui usufono mo le Vaa o Fonoti ona tali ai lea o le Minisita.

**Afioga TIALAVEA FEA TIONISIO SEIGAFOLAVA (Vaa o Fonoti):** Faafetai lava i lau Afioga i le Fofoga Fetalai mo le avanoa.

E tasi lava se vala lea e fia malamalama ai lau Afioga i le Fofoga Fetalai. Faafetai mo le Tulafono Tau Faaofi ua aumai. O galuega uma lava faa-contract nei e saina. O le fesili, a faapea e le o i ai i totonu o se vaega o le konekarate lea e tipi se 10% withholding tax, e faapefea la aua ua uma ona saina le konekarate a le kamupani ma le SOE e fai le galuega, a o la e misi i totonu o le Feagaiga lea na fai le tipi ese o le withholding tax? O fea la e malosi o mea ia faamolemole?

**FOFOGA FETALAI:** Malo faafetai. Tulai mai lau Afioga i le Minisita, o lea ua uma ona folasia i malae saunoaga a sui usufono mamalu.

**Tofa Hon TUILOMA LAMEKO:** Lau Afioga i le Fofoga Fetalai, o le a fai atu au tali e lavea uma ai lava tagata na fai fesili. Aua le toe tu mai se isi aemaise lava oe lena Palusalua o lena e te laitiiti.

Lau Afioga i le Fofoga Fetalai, ua silafia lelei e le mamalu o le Maota, o le faamoemoe o le Malo aemaise a tatou tupe maua ona o lea tatou te pisa i aso uma ua le faia auala, ua le faia suavai taumafa, e le faia mai luga. O tupe uma nei e maua i le Ofisa o Lafoga lea e faamoemoe i ai le tatou budget. Ou te masalo po o le 80% o tupe maua a le Malo e aumai mai le Matagaluega o Lafoga o Tupe Maua. O le estimate lea e maua mai i le tupe lenei i withholding tax, e tusa pe \$10.2miliona e maua mai i withholding tax.

O le mataupu lea e laga e faapea ua i ai nisi ua le totogia ni withholding tax e solitulafono, leaga fai mai le Tulafono afai o oe o le fai konekarate, afai e le i pay out ina le tupe lea o lau claim i le Malo e tipi le 10% muamua o le withholding tax. O le purpose lena, o le mafuaaga o le holding tax lea e taofi ai, a o le faamoemoe lava a uma le tausaga ua fai a latou return ona toe faatulaga ai lea o le tulaga lena. O le faamalamalamaga lena i le tulaga lea.

O le isi mataupu lea na faapea mai e 10% tatou ae 15% la e tipi i o, se e le tatau ona faatusatusaina ma tatou ona e tatau lava ona i ai sina eseese o a tatou withholding tax ia e tipi ma i latou mai fafo.

O nisi vaega na taua e nisi o sui usufono o le itu lea e faapea e le tipiina e le Inland Revenue. E le na o le Inland Revenue a o Matagaluega uma lava e saina ai konekarate e faia le mea lava lea e tasi, ae out e tali atu e solitulafono. E tatau ona totogi ma afai la o le Matagaluega o Tupe Maua ua mafua ai ona le tipia le tupe lea, e pau la i ai. E pau i le Matagaluega ma le Pule Sili aua o lea e faafofoga mai le Pule Sili. Afai e le o tipia, ua soli le Tulafono - e ao ona fai le faasala. A o lea ua ou tau atu e leai se isi e exempt e faia se mea faapea i mea tau lafoga e faapea mai ai e sao ia mai vaega ia.

O le tulaga foi e pei ona saunoa se tasi o sui usufono mo Vaimauga Sisifo, Tofa Lefau Harry Schuster i tulaga faa-Faamasinoga e eseese le treat ina, o lou talitonuga e le tatau ona eseese. O le a vaai i ai i le Tulafono, ae le tatau ona i ai se tulaga faapea e i ai se vaega o le Tulafono e treat ai le isi Samoa e ese mai le isi tagata. E solitulafono le tulaga lena i lou iloa pe afai e fai. O Tulafono uma ua fai ia tutusa le treat ina o tagata uma. E tutusa lava tatou uma, o sui usufono ma ai tagata uma, e tutusa i lalo o Tulafono e leai se isi e ese sona faiga.

O lea ou te vaai atu e pei ua maea mataupu na laga lau Afioga i le Fofoga Fetalai, ae a i ai nisi vaega e le o maua lelei, se i ta le taimi o le malologa ona toe faamatala atu lea ma ou te faatu atu ai le lafo, *Ina ia tuuina mai loa le Fesili lau Afioga i le Fofoga Fetalai.*

**FOFOGA FETALAI:** O aga lava ia faa-Palemene e lolo lava i toe ulutaia o le Maota i le mea e te finagalo i ai. O le talitonu e matua leai se masalosalo i se Tulafono e faaulu mai e lau Matagaluega ona e manatu ua silasila i ai le Pulega aemaise o lau Afioga i le Minisita.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faafoega o Lafoga 2014 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Mataupu tau le Va i Fafu, Fefaatauaiga ma Tupe Maua mo le iloiloaina ma toe lipoti mai i le Fono Aoa o le fonotaga o Iuni.

**TULAFONO TAU FAAOFI O TEUTEUGA O LE TULAFONO O LE FAAMASINOGA A LE LALOLAGI MO SOLITULAFONO FAAVA O MALO 2014 – faitauga faalua**

**FOFOGA FETALAI:** I le toesea ai o le Afioga i le Palemia out e tapa lau Afioga i le Sui Palemia e tulai mai.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai i le toesea ai o le Afioga i le Palemia out e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014 i lona faitauga faalua ma out e fia tautala faamalamalama i ai.*

*Faaluaina e le Minisita o Tupe ma se tasi o sui usufono mo le Au Palota Taitoatasi, Afioga Maualaivao Pat Ah Him.*

**FOFOGA FETALAI:** Tulai mai lau Afioga i le Sui Palemia e te saunoa faamalamalama i le Tulafono Tau Faaofi.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, o le tasi lena Tulafono Tau Faaofi puupuu ma e manaomia ona pasia aua lava tulaga faava o Malo. O le faamoemoe la o lena Tulafono Tau Faaofi ina ia teuteuina ai le Tulafono o le Faamasinoga a le Lalolagi mo Solitulafono Faava o Malo 2007 po o le Tulafono lea e faavaeina ai le International Criminal Court.

O Teuteuga la ia e manaomia ona pasia lau Afioga i le Fofoga Fetalai e pei ona aumai i le Tulafono Tau Faaofi, o ni iugafono na pasia i se fonotaga faava o Malo sa faia i Kampala i Uganda. O Teuteuga la na i le Tulafono lea e masani ona faaigoaina o le Tulafono na faia i Roma ma o Samoa o se sui auai o le Tulafono po o Feagaiga foi ia faava o Malo lea na avea ai tatou ma sui auai i le tausaga 2012.

Ona pau la le Teuteuga lau Afioga i le Fofoga Fetalai lea o lo o manaomia i nei, o le tuuina i totonu o le solitulafono faapitoa o le osofaiga e faatamaia ai po o lona faa-Peretania ina o le crime of aggression. O le tulaga lena e pei ona silasila i ai o lo o ua i ai uma teuteuga o iugafono o le fonotaga lea e pei ona ou taua.

O se faamalamalama puupuu lea lau Afioga i le Fofoga Fetalai e tusa ai ma lena Tulafono Tau Faaofi.

**FOFOGA FETALAI:** Malo faafetai saunoa faamalamalama. O le a lafo atu pea le avanoa i lo tatou Maota i se isi e fia saunoa i lena Tulafono Tau Faaofi taua.

E manatu ua malamalama le Maota.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa mo le iloiloina ma toe lipoti mai i le Fono Aoa o le fonotaga o Iuni 2014.

**TULAFONO TAU FAAOFI O FAATULAGAGA FAALETULAFONO  
O FUA O LE MAMafa MA FUA ESEESE O OLOA 2014  
– faitauga faalua**

**FOFOGA FETALAI:** Tulai mai lau Afioga i le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faatulagaga Faaletulafono o Fua o le Mamafa ma Fua Eseese o Oloa 2014 i lona faitauga faalua ma ou te fia tautala faamalamalama i ai.*

*Faaluaina e le Minisita o Tupe ma se tasi o sui usufono mo le Au Palota Taitoatasi, Afioga Maualaivao Pat Ah Him.*

**FOFOGA FETALAI:** Tulai mai lau Afioga i le Sui Palemia.

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai. O lenei Tulafono Tau Faaofi e tele ni masina o tau tapena mai. O se Tulafono Tau Faaofi ina ia tutusa ai tatou i Samoa nei ma atunuu o lo o tatou fefaatauai i le faatulagaina o ituaiga o fua o mamafa ma fua eseese o oloa. O lona uiga o atunuu ia o lo o tatou felatai i tulaga o fefaatauaiga o oloa, po o a tatou paaga foi ia tau atinae e i ai Niu Sila, Ausetalia ma isi atunuu o le tatou faaitulagi ina ia o tutusa a tatou fua o mamafa ma tulaga ua i ai ia atunuu ina ia faafaigofie ai tulaga o fefaatauaiga, ma ua suia ai le faiga o lo o faaoga i le taimi nei o le imperial po o le faa-Peretania lea o le imperial system i faiga faamaterika po o le metric system.

E pei o se faataitaiga e faaogaina ai iunite, iata, aunese ma pauna kalone ma o le a le toe faaogaina le tulaga lena, a o le a faaogaina kalama, mita, kilo, lita ma isi.

O lea foi Tulafono Tau Faaofi o lo o faatulaga mai ai le tataua lea ona iloiloina ma faamaonia muamua e le Matagaluega ituaiga fua o mamafa ma fua eseese o oloa a o le i faaogaina mo fefaatauaiga. O lona uiga o mea foi ia o scales aua ua i ai fua eletoroni po o electronic scales ua tele ina faaoga i nei vaiata i faleoloa.

O le matafaioi la a le Matagaluega o lo o aumai foi i lenei Tulafono Tau Faaofi, o le siakiina lea i taimi talafeagai ma o i latou e o e asiasi ma siaki le fuaina o oloa ua faatau i faleoloa.

O isi vaega lau Afioga i le Fofoga Fetalai e noatia ai le tele o le faatauina atu o oloa eseese i se tulaga foi lea e le o sao le fuaina po o le makaina o le



mamafa tele po o le lapoa, mamao foi po o le umi ma le taimi i luga o oloa. Peitai e eseese faaupuga e ave i le fuaina o oloa mo se tulaga faapena e i ai mamafa eseese e i ai le net weight ma tulaga faapena. O le tele foi o faioloa o lo o latou faaaogaina e pei ona ou taua electronic scales i lenei foi vaitau ma o lo o i ai le metric system e faaaogaina e le electronic scales mai fafo. O le tele lava e pei ona masani ai i le tele o tausaga o lo o faaaogaina e pamu penisini le litre e faatauina atu ai le penisini faapea foi ma le diesel o le tele o tausaga e oo mai i le aso, o lo o faapena ona faaaogaina pea le tulaga lea.

O le Tulafono lenei e soloia ai le Tulafono o Fua 1960 o Tulafono tuai lena o lo o tatou faaaogaina i le taimi nei. O le faamoemoe o lenei Tulafono ina ia soloia le Tulafono lena, ae tele se vaitaimi o le a faapena ona tuuina i le au faioloa ina ia faamasani ma silasila pe i ai ni fetuunaiga i le tulaga o le fuaina o a latou oloa o lo o i ai i le taimi nei, ina ia oo atu i le taimi e faamamaluina ai le Tulafono ua atoatoa uma tulaga ma ua lava tapena. E faaaogaina foi e aoga ia fua ia, ma e malamalama foi i ai alo ma fanau aoga o lo o aaoaina foi le metric system ma e malamalama foi i le imperial system e pei foi ona tatou malamalama ai.

Lau Afioga i le Fofoga Fetalai, pei o le tulaga taua lena o lenei Tulafono na ona suia faapena o le tulaga o le tatou see mai le imperial system po o le faa-Peretania la e i ai o pauna ma aunese ma tulaga faapena ia tatou see loa agai i le vaega lea o kilokalama ma vaega faapena e taua o le metric system. O atunuu ia o Ausetalia ma Niu Sila lea tatou te fefaatauai nei o lea ua faaaogaina le metric system, o le tulaga lena o le tele o mea ia e silasila i ai le tatou Malo, o le suiga fou po o se faatulagaga ia tatou o gatusa ai ma le tatou faaitulagi lea tatou te fefaatauai ai ma tatou paaga ia e pei foi o le tulaga na sui ai le tatou taimi, o le siiina o le laina o le internation date line ia o lea ua tatou aso tutusa ma Niu Sila ma Ausetalia. O faiga uma nei o lea foi ua oo mai i le tulaga o le fua o mamafa ma mea faapea, a ia manatua foi o le suiga o le tatou dateline e faafaigofie ai i o tatou tagata feoaiga, ia feoi atu i Ausetalia ma Niu Sila e le gata i faalavelave, ae o isi tulaga tau pisinisi ae faapea foi i le au faatauoloa i le tulaga o le fefaatauaiga o oloa, ina ia faigofie le tulaga lea. O lea foi la le faamoemoe o le Malo ia tatou o tutusa foi la ma le metric system lea o lo o faaaoga foi e na atunuu ina ia tatou faafaigofie ai tulaga uma ia e pei ona ou taua.

O se faamalamalama lea lau Afioga e tusa ai ma lenei Tulafono Tau Faaofi.

**FOFOGA FETALAI:** Faafetai saunoa faamalamalama i lau Afioga e a ia le Tulafono Tau Faaofi, ma e manatu foi ua manino le faafofogaaga a le tatou Maota, o le a faaauau le tatou felafolafoaiga i lenei Tulafono Tau Faaofi pe a tatou taliu mai i la tatou malologa masani o le taeao.

*Na faataatia ese Taulumaga a le Fono Aoa mo lana malologa masani i le itula e 10:44 i le taeao ma toe faaauau i le itula e 11:21 i le taeao.*

**FOFOGA FETALAI:** E momoli le agaga faafetai i lenei vaega o le aso o lea ua tatou taunuu mai i le vaega mulimuli o le tatou Fonotaga, e i ai le talitonuga ua toe faafoisia lo outou malosia e ala i le tatou malologa na mavae

atu nei. E talitonu foi o lea ua malu i fale ma palega auau le taliga o le sua i le paia ma le mamalu o le tatou Maota. O le agaga ma le faamoemoe ia maua pea lo outou malosi i la le tino e faaauau ai le tatou galuega e pei ona tatou faatulagaina.

E faia le malologa ua maea ona faamalamalama e le Minisita e a ia le Tulafono Tau Faaofi, ma e manatu ua manino le faatofalaiga a le Afioga i le Minisita mo Pisinisi, Alamanuia ma Leipa po o le Sui Palemia e ala i le faatulai mai o lenei Tulafono Tau Faaofi taua. E ave le faamuamua ma le manulauti ia aua nei o tatou see ese ma le tatou aafia i suiga tetele ua taunuu mai i le lalolagi, e ala i le tele ma le anoanoai o mea o lo o faagasolo mai, ae o se tasi lenei o mataupu taua o le molimauina o fua o mamafa ma measurements mai lea vaitaimi i lea vaitaimi ma tulaga o mea uma e aafia ai le tatou soifua atiae i so o se vaega ma so o se auala e le gata i oloa gaosi ao le faia foi o galuega i totonu o le tatou atunuu.

O le avanoa lenei e tuuina atu i se sui usufono e fia saunoa i lenei Tulafono e faaali i ai le finagalo ona tuu atu loa lea o le fesili. Tulai mai le sui usufono mo Faleata Sasae. O lea o le a tamua ia te oe ia felafolafoaiga.

**Tofa AVEAU TUALA LEPALE NIKO PALAMO (Faleata Sasae):** Faafetai lava i lau Afioga i le Fofoga Fetalai faafetai foi ua maea taligasua a le Maota nei. Ua ou tulai atu e fai sina manatu e uiga i le Tulafono Tau Faaofi e pei ona faataatia i luma i le Maota nei. E muamua ona momoli lau faafetai i le Afioga i le Minisita ma le Matagaluega. E talia foi e lou sui usufono le Tulafono Tau Faaofi. Na pau lava le vaega o le Tulafono Tau Faaofi e fia avatu ai se faamatalaga pe le ono toe tagatagai ifo i ai le Matagaluega ma le Afioga i le Minisita aemaise foi le Ofisa o le Loia Sili.

E pei ona silafia o lenei Tulafono Tau Faaofi, o le a faaaogaina ai e pei ona saunoa lau Afioga i le Fofoga Fetalai o le tele o vaega e fua ai galuega, o le mamafa, o le mamao, o le eletise, o le tamoe, o mea uma lava. E ono fua po o le a le mamao, o le a le mamafa, o le a le saosaoa, o le a le malosi. Ae silasila le Maota Fono o nei mea uma e leai se suiga tele o i ai, o mea lava ia o lo o faaoga i le taimi lenei pe a tagai i tua i le vaega 1 ma le 2 faaopoopo o lo o i ai, o le tele o le vaega lena o lo o i ai nei. Na pau le mea lea ou te fautua atu ai i le Afioga i le Minisita ma le Matagaluega o le aveeseina lea o futu, inisi, pauna, aunese ma isi mea ia pei o le kalone o lea o le a sui i le lita. E tasi lenei o poto atamai ua i ai le tatou atunuu aua e leai se isi o tatou e lei aoga i le vaega lea. Aua o le poto atamai lea ua i totonu o Samoa i le taimi lenei, ua mafai lava ona sui le futu agai i le mita, e mafai ona sui le inisi agai i le senitimita e oo lava i le mamafa ua iloa lava le pauna ma le kalama o le kilokalama, ua iloa foi le vaega o le lita ma le kalone.

O lau la fesoasoani pe le mafai ona tuu ai pea ina ia alu pea le tatou vaaiga i le Tulafono Tau Faaofi lea ua taatia ae faaoga pea le vaega lea, ma faamalosia pea le vaega lea e pei ona taatia i le taimi nei ona o le manaoga. Aua o lea ou te vaai atu i i o le manaoga ina ia o tutusa ma atunuu i fafo.

Silasila lau Afioga i le Fofoga Fetalai, e i ai lava atunuu tetele o la lava e faaoga ai le vaega lea e pei o Amerika, o la lava e faaoga le futu ma le inisi, a e alu i Peretania o la lava e faaoga le kalone, le system foi lele. A o atu la a tatou fanau i atunuu ia, e tataua ona o atu o malamalama lelei i vaega nei, i le futu, aua lou iloa o le isi lea atamai sa aoaoina, a fai loa le tatou Tulafono Tau Faaofi lea e tape ese ai, o lona uiga o le isi sefulu tausaga oi luma ua le toe

iloa e se tamaititi Samoa se futu aua ou te iloa foi o le a ogatasi ma aoaoga i totonu o aoga pe a tei ua i ai se vaega, aua o lea e vaai atu nei i le Tulafono Tau Faaofi, o lea e pei e faaalu agai le fua o oloa, o le faatauga ma.... Ae o mea uma ia e tatau ona sau le aoga mai le Matagaluega o Aoga ina ia malamalama ai tamaiti. O le taimi lenei, a e alu atu e aumai sau pauna e te alu lava fai i ai e aumai sau pauna mamoe, e seasea e faalogo o faapea e aumai sau lua kilokalama mamoe. O le poto masani lea ua i ai tatou, ao la ua i ai le fua, a fai atu o le pauna o la lava ua i ai le fua e convert ai i le kalama, e leai la se mafuaaga o le a ala ai fua ona aveese vaega ia o le poto masani lea ua i ai tatou ae le tuu ai pea ae faamalositia lea isi vaega lea e alu, o le a tatou alu i le system lea, ae faaoga a alu atu lava le tagata e aumai le..... ina ia aua ai nei o tatou taofia le poto lea ei totonu o a tatou fanau i le isi vaega lea.

O le manatu lena ua ala ai, a o le Tulafono Tau Faaofi, faitalia le Tulafono ia ogatasi tatou ma lalo o le Tulafono lea e pei ona faavae ai i Kampala lea ou te vaai atu e sui ai le Tulafono lea i Roma. E i ai lava lou manatu lau Afioga i le Fofoga Fetalai, sei toe tagatagai ane lava, o le tele o Tulafono lea tatou te suia ua agai mai i le manaoga mai fafo ae tatou te le autilo po o le a se advantage po o le a le mea e faataua ai i totonu o alo ma fanau, aemaise o le mamalu o le atunuu. O lea ou te talosaga atu ai i le Minisita sei toe tagai ane lava aua e leai se afaina o le tuuapea o le faaogaina o le vaega lea ae alu le Tulafono ia, aua ua ala ona ou faatu atu lea vaega, aua o lea ua i ai faasalaga i totonu i i pe afai ae i ai tagata e faatino le mea lenei. A maua se faleoloa, ia tailo i ai ou te le iloa i ai pe faapefea le tagata kamuta, aua o le tele lava o kamuta a fua le tele o le futu, inisi, ae o lea e fai mai i e faaoga le mita ma le inisi. O lea la ua i ai le faasalaga i totonu o le Tulafono Tau Faaofi lenei, o le mea lena e ala ai ona ou tatalo atu i le Fofoga Fetalai ma le mamalu o le Matagaluega sei toe tagai ane lava, e leai lava se afaina o le tuuapea o le faaogaina o le vaega lea e maua ai le poto masani o le tatou atunuu. Ma le faaloalo lava.

**FOFOGA FETALAI:** Malo, faafetai saunoa i le sui usufono mamalu mo Faleata Sasae.

Tulai mai le sui usufono mo Faleata Sisifo.

**Tofa LEALAILLEPULE RIMONI AIAFI:** Faafetai i lau Afioga i le Fofoga Fetalai mo le avanoa. Faafetai foi i lenei Tulafono Tau Faaofi. O le fesili muamua ae lei faia sau faamatalaga i le Tulafono Tau Faaofi lenei, o i ai se manaoga faapitoa, is there a dire need ua ala ai ona aumai lenei Tulafono? O i ai se faaletonu o i ai i le taimi nei, o i ai se fenumiaiga i tagata faatau le atunuu ma le aufaipisinisi ma le au faioloa ua aliali mai ua mafua ai ona finagalo le Matagaluega e aumai lenei Tulafono Tau Faaofi? O lau vaai i ai o Tulafono foi ia lea e omai le au consultant mai fafo ma tagata mai fafo aumai ma tatou o tatou fai, ae le lava se taimi e faatalatalanoa ai le atunuu ma tatou pe tatau ona fai pe leai. O le mea lea e i ai, po o fea le atunuu o le lalolagi e te alu i ai e le laugatasia uma le lalolagi i fua ia. O tatou foi o le atunuu e le tele ni a tatou oloa e tatou te faatau oloa mai i le tele o atunuu Niu Sila, Ausetalia, Iapani, Saina, Amerika. E le mafai la ona tatou fuapau faapea, faiga a Niu Sila ma Ausetalia o Niu Sila foi ma Ausetalia e limit e le tele ni a latou oloa e ono aumai i fafo, pe a faatusatusa i atunuu tetele ia o le lalolagi o Amerika. O Tutuila lea e lata mai i i, o Tutuila e aupito i sili ona tele a tatou talo lea e alu

i Tutuila i lo se isi lava atunuu, tatou faatauga oloa lea e i ai nei ma le tele o mea ia e i ai nei.

O le popolega lea. O le mea lea e i ai, o le faatauga o iata o ie aua a tatou o e faatau a tatou ie na ua e iloa le iata e fai ai lou ie, tolu iata, lua ma le afa iata, ua masani ai le au faatau oloa masani ai tagata e sui ofu. O le a le mea o le a sui ai fua i leni mita? A e alu e faatau sau pauna mamoe, o tatou o le tele o tagata i tua pau lava le mea e manaomia o le pauna suka. O lona uiga a faatau kilo ua le mafai ona toe faatau se pauna suka seiloga e atoa le kilo faatoa faatau? O le kilo mamoe, o tatou ua masani i le pauna mamoe, pauna lea mea o le a le mafuaaga? A ou fesili o le a le tele o lou fanua? E kuata eka la ou te nofo ai i Vaitele, afa eka, e le malsmalama se isi pe a faapea o le hectares lea ou te nofo ai, o le a ea le faasamoa o le mea lea e aumai ai i i, o lona uiga e faapea o la ou te nofo i le hectare 10,000 sq mita, e leai ma se isi e malamalama i nei mea. O le a le mea ua faafaigata ai fua le mea o lea e lelei ma matagofie? Ana fai se consultation ma tua i tagata e i ai se mea a sui ai fua nei mea, o lea ua aumai le penisini o la e alu i le lita sa amata i le kalone sui i le lita, e adjust lava tatou. E masani, e le o ni tagata vaivai i tatou o tagata e lava le aoaoina, a tatou o atu i Niu Sila a e tago i le label o le seevae po o le ofu e sau lava i luga, size Amerika size UK, e sau ai lava i luga o le label o mea. Ae leaga o le olaga o tagata, e le mafai ona tamaua. O lona uiga o le a aumai e i tatou e mulimulitaia ai i manaoga nei a o la e fai e atunuu tetele mea nei, aua e le tasi se maketi e aumai ai a latou oloa? Ia o faasalaga lea e i ai nei, e tai 300 iunite. A tau le 300 iunite, e \$30,000 le tele o isi faasalaga lea e sau i le Tulafono Tau Faaofi. Ae faapefea ona fai nei ituaiga faasalaga faapenei?

O le isi mea, o lea ua aumai i i, e i ai le malosaga o le Minisita e tofia ai ni tagata foi nei – engage ni tagata private e o e fai ma inspectors e asiasi mea nei. Ia o mea nei a le Matagaluega e fai i aso uma, e o e asiasi le tau o oloa ma asi atu ai ma nei mea. O le a le mea o le a toe fai ai foi lona mea ma le tele o tupe feaveai ma mea faapena? O le pata, ua tatou iloa lava le afa pata ma le pauna pata, ua tatou iloa lava. Ua leiloa la pe faapefea ona fetuutuunai faapea le tulaga lea, o lona uiga la o le afa kilo pata po o le kuata kilo pata? O le mea lona lau Afioga, i lou talitonuga e tatau ona toe faafoi le Tulafono Tau Faaofi leni, toe faafoi. Sei vaai foi i le Tulafono o Terorisi lea na afio mai ma le Minisita mo Leoleo ma Falepuipui, na toe faafoi lava ma faafou lelei mai, toe fetuutuunai aumai ua atoa lelei.

Lau Afioga, o lou lona manatu ma lou vaivaiga, e le aoga leni Tulafono Tau Faaofi ia tatou, e o atu foi i tua i nai faleoloa, e oo foi i pauna suka ma aniani ma pauna masima, e le tele ni oloa a nai tagata, ae o le a toe alu atu ma leni faamamafa? O le a over regulate, o le a ova Tulafono ma nei mea fou e aumai, e leai se faamamaavega ma se fesoasoani i tagata lautele. I lou la talitonuga, fua i le mafuaaga o lea ua ou tagai au i ai ma ou tautala atu ai i lau Afioga, o leni Tulafono Tau Faaofi, e tatau ona toe faafoi i le Matagaluega, faataatia, e leai se aoga mo tatou. E tele Tulafono e aumai o lea lelei ma tatou lagolagoina, ae o leni lava Tulafono Tau Faaofi i lou talitonuga, e le fetau. Ma le faaaloalo lava.

**FOFOGA FETALAI:** O lea ua maua le atugaluga o le sui usufono mo Faleata Sisifo. O lea tatou te i luga i le faatoa tuuina mai o leni Tulafono Tau Faaofi i se tulaga aloaia. O lo o i ai le avanoa i le tulaga lea e te atugaluga i ai i

tatou mea faa-Komiti, o i ina e agai uma i ai o lena e tele le avanoa e matimati ai le Tulafono Tau Faaofi. E le o se tulaga faapea o le a faitau faatolu le Tulafono Tau Faaofi i le aso. E leai. O ala o mea e le o mama foi i le Matagaluega ma le Minisita le silasila i le Tulafono Tau Faaofi lenei, ae o lo o i ai le avanoa e fai ai o outou finagalo i le mea o i ai le atugaluga. E leai foi se isi mea atoatoa, o la e lava nei laaloa se vaai, a uma le tatou felafolafoaiga lenei, o le manatu ma ni finagalo tou te finagalo i ai, o lea e faamaumau e le Minisita ona ave lea i le Komiti e soalaupuleina nei mea, ona tuu mai lea ma teuteuga. O lena ua outou silafia le tatou mea masani. A o le toe faatulaga lelei i lou finagalo, ia, e talu ae popoe, ua alu le taimi aafia ai ma le Loia Sili. E le o ni tamai mafaufau mea ia na fausia ai le Tulafono Tau Faaofi. A o le timai ma le finagalo o le Maota, o le a i ai le avanoa i taimi o le Komiti ona faatulaga ai lea.

Sei tulai mai le Afioga i le Minisita mo Faatoaga ma Faigafaiva.

**Afioga Hon Le Mamea Ropati (Minisita mo Faatoaga ma le Faleoloa o Faatoaga ma Faigafaiva):** Malo faafetai i lau Afioga i le Fofoga Fetalai. E ese le manaia o le folasaga a si ou uso lea na faatoa mavae atu nei. O le mea ou te faanoanoa ai, o le sui usufono lea, tasi lea sui usufono talavou o lea e i totonu o le Maota lenei, o le tagata e tele le finagalo ma le poto ma le tomai la e i ai. O le soifuaga lenei tatou te i ai, tatou te agai i luma. Ua leva ona talanoa mea nei o kilo ma mita i totonu o le tatou atunuu. A silasila i atunuu i fafo, e le mafai ona toe fai mea o tuuga lea e tamomoe ai tatou athletes e faapea e 100 futu lea o le a tatou see i ai. E leai, e 100 mita, 4,000 meters. E le o toe tau ani futu ma nim ea faapena. A tau atu nei la i tatou athletes faapea sau o lea o le a e tamoe i le 200 futu po o le 100 futu, e matua le malamalama le iloa fua le taimi e tamoe ai. Na o mea o athletes, tagata fou uma ia e agai i luma, ua fua uma i mita fua i metric a latou fuafuaga lea e i ai. E leai se mea e te atugaluga ai, ua leva ona tau tatou kilograms ma meter ma mea faapena. O le mea ou te fai atu ai, ona o au foi i lau profession, e aafia foi i ituaiga mea nei pei o kilograms ma aunese ma pauna pe a fua pauta e fua ai vai ma mea faapena. Ioe. E agai i luma le lalolagi lea tatou te i ai. Ae a tatou tumau ai lava faapea, ae talofa e i nai alo ma fanau a tatou lea ua tutupu mai i lenei vaitau ua le toe talanoa nisi i ni pauna ma ni... o lea ua amata ona talanoa i mea tau metrics. Ia, ae o le saunoaga lea faapea o le Tulafono Tau Faaofi e leai se aoga, sole, oi a le aoga alii ua e faaleaogaina mea la e ao e nai faiaoga i tua, o la e faatusatusa le mita i le iata ma mea uma faapena. Ae le faapea e le aoga le Tulafono Tau Faaofi, e matua aoga lava mo alo ma fanau mo le agai i luma

Ia o lau soso atu lea i le Tulafono Tau Faaofi lenei e pei ona saunoa si ou uso a sui usufono lea iinei i le taulaga.

**FOFOGA FETALAI:** Malo. E i ai se isi mea le sui usufono mo Faleata Sisifo, o lea ua e faafofoga ma ii le,....

**Tofa Lealailepule Rimoni Aiafi:** Faafetai i le fesoasoani mai a le Afioga i le Minisita lea. E moni a au, ae pei o le amataga o lau lauga, pe i ai se mafuaaga ua ala ai ona sui, o i ai se faafitauli ua tulai mai. O le mea e taumafai i ai lenei sui usufono e pei foi ona saunoa atu se isi o sui usufono, e fetuunai lava e tatou, e natural lava le fetuunaiga e le tagata Samoa ua lava

lona mafaufau o le mea lenei. E pei ona ou talanoa atu, e le o mafai ona tatou suia fua o la e fua ai Amerika ma Peretania ina ia faatutusa ma tatou, ma Saina. O la e foi e i ai latou fua la e fua ai.

O mea tau taaloga, ia, ua tatou malamalama lava o taaloga e mafai ona fetuunai, a o fua faatatau o meaai ma mea nei, o mea na. O le isi mea, i le fua la lea o faatau, aua a faapea nei e fua kilo le suka, o lona uiga e le toe taulia le pauna suka, pe kilo le mamoe ua le toe taulia le mamoe? O le mea lena o lea e fai atu ai e fuafua i le tupe maua a tatou.

**FOFOGA FETALAI:** Malie le sui usufono mamalu sei tuu atu le avanoa i le Minisita mo Fesootaiga ma Faamatalaga Tekonolosi o lo o tulai mai.

Tulai mail au Afioga i le Minisita.

**Afioga Hon Tuisugaletaua Sofara Aveau:** Faafetai i lau Afioga mo le avanoa. Ona o lea e saunoa le sui usufono mamalu o lo o ia aumaia pea saunoaga faapea po o le a se mafuaaga. O le tasi la lea mafuaaga e le na o le pau lea. O le mafuaaga, e le toe tau faia ai se faatusatusaga i se tamaitiiti. Ia manatua o tatou lea e o i le taimi lenei, o lea e i ai fua e lua, e le toe faia la e le tamaitiiti se faatusatusaga o le kilokalama ma pauna, e le toe faia. Aua foi na o le tasi lava le fua. E tasi lena mafuaaga.

**FOFOGA FETALAI:** Malie sei tuu atu le avanoa i le tali a le Sui Palemia, ona tuu atu loa lea. Sei tuu atu le avanoa e faamalamalama le mataupu.

**Tofa Hon Fonotoe Nuafesili Pierre Laufofo:** Faafetai lava i lau Afioga i le Fofoga Fetalai. O lea foi sa nofonofo lava ma faalogologo ona o se Tulafono Tau Faaofi taua lenei Tulafono. O lea ua tatou talanoa i le suiga o fua e faaoga, le mamafa. O lea la sa i ai le manatu sei saausi pea saunoaga a le Maota sei tau faalogologo po o fea e agai i ai. Ua uma ona avatu nisi mafuaaga i le faamalamalamaina o le Tulafono Tau Faaofi. O le tasi o na mafuaaga, o lea ua tele ina faaoga i Samoa nei le metric system, ua tele ina faaoga. O faleoloa, e pei foi ona ou taua le fua foi lenei, scales. O penisini, ua leva ona faaoga le lita. Ae oo mai i le taimi lenei, e leai se Tulafono e faatulafono ai la le mea lea, le metric system la lea. O lea la ua tilotilo atu le tatou Matagaluega ma le Malo, ua talafeagai le taimi ona o le tele o oloa ma tulaga faapena, o lea foi sa taua fualaau i faletalavai, e faaoga uma mea ia o grams ma tulaga faapena, isi iunite laiti ifo, le kilo, e faafaigofie ai ona vaevae ma faaoga.

O le isi mafuaaga pei ona ou fai atu, o lea ua tatou o ia tatou o tutusa ma isi atunuu lea e i totonu o le tatou itulagi, le tatou region, o lea e faaogaina le mea o le metric system, e pei foi ona ou taua o lea na sui le tatou laina, tutusa a tatou aso. O lea foi la ua tatou agai atu e faatutusa a tatou fua ia. O Niu Sila ma Ausetalia lea ua faaoga le metric system, a o tatou major trading partners ia. I totonu o le Pasefika, o le tele o motu o le Pasefika o lea ua o uma lava i le system lea. O le tulaga taua la lena o lea e i ai, o lea foi ua aoaina i totonu o tatou aoga. Ia silasila la i ai i le tele o mafuaaga? E tele mafuaaga taua lea tatou te agai atu i ai ma tatou vaavaai.

Na pau lava le mea lea ou te faalogo atu e pei o lo o aumai i saunoaga ia na aumai nei i le Itu le la, o le agaga foi lea e musu e sui se mea fou. E le taofia

atinae a le tatou Malo ma le atunuu i le musu e sui se mea fou. E agai i luma le lalolagi ma agai i luma a tatou atinae.

**Afioga Hon Palusalue Faapo II:** Lau Afioga i le Fofoga Fetalai o se mea e fia faasao.

**FOFOGA FETALAI:** E uma ou avatua le avanoa, e uma ou avatua le avanoa.

**Tofa Hon Fonotoe Nuafesili Pierre Lauofo:** O le vaiaso na tea nei, talu ona oo mai suiga fou, o le tele o suiga fou e aumai mai fafo. E le mafai ona tatou tutu ma tatou nofonofu i le mea lea tatou te i ai, e tatau ona tatou o faatasi ma le taamiloga o le lalolagi lea ua taamilo ai. O le tulaga lea i lau Afioga.

**FOFOGA FETALAI:** Malie le sui usufono mo Faleata Sisifo sei tuu atu muamua le avanoa i le Afioga i le Taitai o le Itu Agai ona tuu atu ai lea le sui usufono.

**Afioga Hon Palusalue Faapo II:** Lau Afioga, leaga e matuia tuuaiga ia faapea o le Vaega lenei e mumusu i se suiga fou. Lau Afioga i le Sui Palemia, suiga fou i le mea tatau. Silasila i le suiga o taimi? O le a lau maitau i le taimi lenei? O lea e te finagalo ia taimi faatasi ma Niu Sila ma Ausetalia? O le suiga o le taimi e leai se taimi tatou te taimi faatasi ai ma Niu Sila.

**FOFOGA FETALAI:** Lau Afioga i le Taitai o le Itu Agai, le Taitai o le Itu Agai....

**Afioga Hon Palusalue Faapo II:** Se leaga e tatau ona faasao le saunoaga lea.

**FOFOGA FETALAI:** E le toe tautalagia se mea ua uma ona pasia e le Maota.

**Afioga Hon Palusalue Faapo II:** O le faataitaiga lau Afioga.

**FOFOGA FETALAI:** Aua le faaaogaina faataitaiga na leaga e faaoloataua ai le tatou mea lea e fai. Agai pea i nisi mea, a o le suiga o le taimi, ia ua pasi le Tulafono ua faatino ae o lenei tout e faitio? Faaaoga nisi faataitaiga e faau mai ai le mea lea tatou te taumafai e faamalamalama i le Matagaluega ae le aoga ona faitio pea faitio pea i mataupu ua uma ona pasia. O le agaga lenei o lea e tau avatu, e faamanualia ai finagalo leaga o lea tatou te faatino, ae o lea lava.... O le Tulafono Tumau, e le mafai ona tatou toe taulagia ni mea ua maea.

**Afioga Hon Palusalue Faapo II:** Lau Afioga i le Fofoga Fetalai, leaga e matuia le tuuaiga a le Sui Palemia fai mai e mumusu lenei Itu e fai ni suiga fou. O lea ua ou tulai atu ail au Afioga i le Fofoga Fetalai e faasao le saunoaga lea, leai e le mumusu le Itu lenei e fai suiga fou, a o suiga e tatau.

**FOFOGA FETALAI:** Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, e le matuia tuuaiga. O le fesili na tuu mai le Itu le la, o le a le mafuaaga ua sui ai, aisea ua sui ai fua? Tatou o ai pea i le mea la e i ai. A o lea e avatu mafuaaga ia ua ala ai ona sui, o mafuaaga lelei, o mafuaaga taua. E leai se mea o leaga i mafuaaga ia e avatu, ioe.

**Afioga Hon Palusalue Faapo II:** Lau Afioga i le Fooga Fetalai, nap au lava le mea e fia faasao, ia faasao au lafoga ia e aumai i le Itu lenei, e le faapea e mumusu iinei e fai suiga.

**Tofa Lealailepule Rimoni Aiafi:** Lau Afioga i le Fofoga Fetalai, o le aso po o le 15 lea o tatou Tulafono ua talanoaina ma pasia. O le Tulafono Tau Faaofi taua lenei ua ou tulai atu e tetee, a o isi Tulafono uma e lagolago ma avatu fautuaga e faaleleia ai. E le faavalevalea le sui usufono mo Faleata Sisifo, e faalua ona sikolasipi i Ausetalia ona e poto. O suiga ia ou te fai atu ai nei, o international laws ia a tatou....

**Afioga Hon Le Mamea Ropati:** Lau Afioga i le Fofoga Fetalai, o le mea e fia faasao faamolemole. Se talofa se isi ou uso. Na ou fai atu lelei tasi lea sui usufono e matua tele le atamai lea e i ai nei, a o lea ua nofo lava ia ma tau mai fai mai o ia e faavalevalea ae le o fai atu se isi o ia e faavalevalea. O le matua poto lava, tailo foi i le poto o Solomona pe tutusa ma le poto lea. Faafetai.

**FOFOGA FETALAI:** Malie le sui usufono mo Faleata Sisifo, o lea ua uma ona ou talosaga atu i lou atugaluga. O lea e i ai le avanoa e ave ai le tatou Tulafono Tau Faaofi lea i le Komiti faa-Palemene ona soalaupule lea. A o lou lava finagalo, saunoa sao pea oe i lou finagalo ma ou lagona, ae le mafai ona faalauaitalea e toe faafoi le Tulafono Tau Faaofi. E le mafai ona fai se mea faapena. O le Tulafono o le Tulafono Tau Faaofi a le Malo, ma e lei tago faatumutumulima foi i ai ua uma ona... e aofia ai le Loia silisili ese a le Malo. Ia, ou te le iloa la po o fea le mea e toe faauiga i ai lena mea. Ae o le tulaga, afai o le tulaga lea tou te popole i ai i le faatinoga, there is a grace period, ona ave lea i le Minisita e saina aloaia lona lima i le taimi faatoa faatino ai. A alu atu lava e 50 tausaga faatoa faaaoga, a ua i ai le Tulafono ua tatou amanaia ai feagaiga faava o Malo o lo o tatou o faatasi ma tatou paaga o lo o tatou trade faatasi.

A o le tulaga, malie le sui usufono e agai sao mai e faaiu mai lau saunoaga. Ou te manatu ua manino ma oo lelei lau fautuaga e ala i le Tulafono Tau Faaofi.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai. E faamalulu atu foi i le tatou Maota ona o le mea lea ou te taumafai au e avatu, afai o lea e mafai ona adjust tatou i suiga ia mai fafo without...., ia o lea e manaia lava fetuutuunaiga lea e i ai ona e eseese Tulafono, o isi Tulafono Faava o Malo ia e aumai e laugatasia ai le tele o le lalolagi, a o le Tulafono lea, e le o mafai ona e eseese foi ia isi mea o la e faaaoga e isi atunuu o lea foi e aumai a tatou oloa, e le na o le pau lea. Ma le



isi vaega taua lea e le o maua mai e le Afioga i le Minisita mo Felauaiga o lea tatou te talanoa i mea tau faatauga, o lea e talanoa i le tupe maua e tagata, afai o lau tupe lea i le aso lenei e lava ai na o le pauna aniani ma le pauna suka i lenei afiafi e fai ai le meaai a lou aiga, o le mea la lena o lea e fia fesili ai, afai la o lea o le a oo i le kilo, o lona uiga seiloga e maua lau tupe e atoa ai le kilo faatoa mafai ona faatau? O isi la na mea e fia maua ai le faamalamalamaga. A e alu atu na o le Ziata pe iata lau mea e fia faatau mai, seiloga e atoa le mita faatoa faatau?

**FOFOGA FETALAI:** O lea ua maua le finagalo, se i tulai mai le faauilavea a le Afioga i le Minisita mo Fesootaiga ma Faamatalaga Tekonolosi, tulai mai.

**Afioga Hon Tuisugaletaua Sofara Aveau:** Faafetai i lau Afioga mo le avanoa. Ia o le faataitaga faigofie lea na ou avatu nei lea e saunoa foi i ai sui usufono mamalu. A faapea pei o le mea lea e saunoa tonu ai lava o le 2 kilo ia po o le kilo foi ua le atoa se tupe, e le faavalevatea foi la le faatauoloa, e tuu ifo i lalo le afa kilo, aua e le taulia le kilo e laitiiti le tupe, o lona uiga, e tuu i lalo lana fua ina ia fetau ma le tupe a le tagata. Ma le isi la lea lau Afioga, o tamaiti aoga ia e aoga nei i le taimi lenei, o la e struggle lava i taimi uma, a avatu le kilokalama ona tau fuafua lea e ia po o le a le mamafa i pauna? O lona uiga, o la e alu lona taimi e tau faavasega ai, po o le a le fua sao, aua o le tele o aoga o la ua alu i le kilokalama alu i le kalama, ae o la e tau fuafua e nai tamaiti leaga o lea foi e i ai ma le isi fua lea i autafa ane, la e i ai pauna, i ai le afa pauna, aunese ma mea uma faapena. Ae a aveese loa, e tasi lava le fua e aoga uma ai tamaiti, aua a oo ina ola mai a outou alo ma fanau, latou te le iloa se isi fua, e talatalanoa atu isi i pauna ma mea faapena, e le toe iloa e a tatou fanau i le lumanai, na o le tasi, aua o le fua lena o la e faaoga uma lava e....sei vagana le atunuu e tasi, faafetai.

**Tofa LEALAILEPULE RIMONI AIAFI:** Lau Afioga faafetai, o lea la ua maua mai lava e le Afioga i le Minisita le mea lea ou te taumafai atu ai, a, o tatou i le taimi lenei o tatou tagata e aupito sili ona atamamai lea e i ai nei i le lalolagi, e tatou te iloa faatau le mea e pauna ma le mea e kilo. A tatou o nei i le mea lea e saunoa i ai na o le kilo, o le a maimau le taimi e fai ai le pauna? A e alu atu i Peretania o la e alu pauna, a faaoga lou.....i le falemai, e fia le mamafa o lau tama, e fia pauna? Ia o le mea lea e saunoa i ai.....e afa kilo, e afa kilo e te le maua lava le pauna, a? E lua ma le afa pauna faatoa maua le kilo. Aua pe a tatou mananao e fai le tatou aoga maths i le aso lenei.....

**FOFOGA FETALAI:** E le 2 ma le ½.

**Tofa LEALAILEPULE RIMONI AIAFI:** E fia?

**FOFOGA FETALAI:** E 2.2 grant kilo....se o le uiga lena o le.....Ia malie ia le sui usufono mo Faleata Sisifo, malie ia ua malamalama lou finagalo.

**Tofa LEALAILEPULE RIMONI AIAFI:** Ia lau Afioga o nai manatu na o lea tatou te matimati, e le o faapea ua fai atu e toe e faafoi ma ave ai, e pei foi o le Tulafono Tau Faaofi a le Minisita mo Leoleo ma Falepuipui,

Tulafono Tau Faaofi o Faiga Faaterorisi, faafoi, fai atoa lelei, toe aumai. O lena lava e manaia pauna ma kilo mea uma e popoto ai tamaiti. A uma le kalone penisini o lea ua alu i le lita penisini, o lea o le a toe fetuunai ma tatou iloa lava, pei o le mea lena. Faafetai i lau Afioga i le Sui Palemia, leai e le o se tee i le mea fou, leai, faasa, e le manaia lea tuuaiga, o le mea fou o le mea lelei.

Lau Afioga i le Minisita mo Faatoaga, Faleoloa o Faatoaga ma Faiga Faiva, se pau lea o le tagata e lelei lona tuuina mai, e sao, leaga o le taimi a o ou aoga i le Kolisi e lau au e tamaiti ou te alu e leai sau rubber, e leai se mea sese, manuia le Fono.

**FOFOGA FETALAI:** Ia aua ia le atugaluga leaga o lea ua e saunoa e le faavalevalea le sui usufono mo Faleata Sisifo, leai, aua ia le atugaluga i lena tulaga. O lea foi ua faatusa oe i le Tupu o Solomona, ia o le tupu o le tomai o le Tusi Paia, o le ala fai foi lea ma e avi e pei o Solomona. Ia malo.

Tulai mai le sui usufono mo Faleata Sasae ona sosoo ai lea ma le sui usufono mo Aana Alofi Nu. 3.

**Tofa AVEAU TUALA LEPALE NIKO PALAMO:** Lau Afioga i le Fofoga Fetalai o lea ua saunoa le Afioga i le Minisita, ua ou le iloa foi la po o le tali lea i lau...Ae tasi lava le vaega lea ou te fia faamanatu atu, o le mea tonu lava lea na ala ai ona ou taumafai atu ai, o le taofiofi lea o tatou i le aiatatau a le tamaitiiti e a'o ai so o se mea e manao e a'o, o lea la o le a tatou faia le Tulafono e aua ai ne i toe a'oa e tamaiti le mea lea o le futu, o le pauna, ae a alu atu i isi atunuu o lo o faaoga ai le mea lea ona faaletonu lea. Ae tataua ia tatou ona vaavaai mamao, aua e le iloa foi pe alu alu nei mea o mita i se isi tausaga toe uma, aua o le mea nei o le mea fou o la e aumai e tagata foi ia e taumafai e sell ai latou idea, aua o lea e sau ai i totonu i i mea tau pattern i totonu o le Tulafono. Aua o le mea lena o lea ou te....o lou naunautai lena, aua tatou te faagaogaoa le atamai e mafai ona aoao ma tatou taofiofia mea e tataua ona aoao i a tatou fanua aua le malaga atu nei i fafo mo le tausaga o lumanai, faafetai lava.

**FOFOGA FETALAI:** Malo faafetai fesoasoani mai i le tatou mataupu. O le a saunoa le sui usufono mo Aana Alofi Nu. 3 ia ona sosoo ai lea ma se tasi o sui usufono mo Salega, Afioga Afualo Wood Uti Salele.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. E lua lava nai vaega e fia oo i ai se leo lau Afioga i le Fofoga Fetalai, muamua o le atugaluga i le Tulafono ona o lea ua faatulaga mai, a pasia loa, ua le mafai ona toe faia isi vaega, pei ona maua i faatalatalanoaga i le imperial units ia sa faaoga, o le atugaluga tele ia te au lau Afioga o le tatou eleele. O le taimi nei o fanua uma o lo o fua i le fua tuai, o le a se fuafuaga a le Matagaluga ma le Malo, o lona uiga o le a faaalu se seleni tele e convert uma ai fanua nei i totonu o le tatou atunuu i le metric system lea? Lau Afioga e talitonu le agaga...

**FOFOGA FETALAI:** Ia sei tulai atu le Minisita e a ia tonu lava le matafaioi lea o le mea tau fuagafanua. Tulai mai lau Afioga i le Minisita mo Punaoa Faalenatura ma le Siosiomaga.

**Tofa Hon Faamoetauloga Lealaiauloto Ulaitino Faale Tumaalii:** Faafetai atu i lau Afioga i le Fofoga Fetalai mo le avanoa. Atonu lava o faafanua tuai lava o lo o i ai lava i le FPS System po o le British System lea e faaoga ai le foot-pound seconds, a o le mea lea ua faalogologo atu i le Tulafono, o lea ua tatou o i le MKS System, Metric, Kilograms ma le Second, po o le Centimeters, Grams ma le Seconds, o lea na tatou aoga mai ai, o e uma lava na ave a latou Physics i le Samoa College o Systems ia na faaoga. E i ai la ia faafanua o la e i ai i le Old System lea le British System, ma afai o le tulaga lea i le faatinoina, ia o lona uiga e faaliliu foi la ia tulaga o faafanua i le MKS System lea e taua le Metric System lea e well known ai i le lalolagi. Afai lava la e i ai e i ai se tupe e faatino ai lea auunaga, e tataua lava ona fai, aua o lea ua faatulafonoina e le tatou Malo. Ma lou faaaloalo lava.

**FOFOGA FETALAI:** Ua tuu atu le avanoa mulimuli i le sui usufono, tulai mai le sui usufono mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai, pei o le atugaluga lea, o le naunautaga foi ina ia mafai ona faasaoina seleni mo nisi o atinae o le tatou atunuu, e taua foi lea vaega pei o le auga lea o se soso atu lau Afioga, ina ia aua ne i toe i ai se faaopoopoga fou i se Tulafono e toe alu ai seleni a le tatou atunuu ae taumafai e agaigai i luma.

**FOFOGA FETALAI:** Ia o le a fesoasoani mai le Minisita mo Galuega, Felauaiga ma Atinae Eeseese, tulai mai le Minisita.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai, ou te manatu ua leva ona tapena ia suiga ia, o la e iloga i totonu o mea o teach ia ma faafanua, o la e sau o le imperials ia ma sau foi le metrics, ou te iloa o la e silafia o tulaga uma lava i fuataga e leiloa po o ua ova ma le sefulu tausaga talu ai talu ona tapena auala ia, ma ua leva ona faagaoioi ai, a o la foi e i ai i totonu o Survey Regulations lea sa pasia isi vaega i tulaga lea i suiga lea ua i ai, ma o la e faatino i le taimi nei, a silasila i ai i tulaga e i ai ia faamaumauga uma lava la e i ai talu mai, ae le o suia ai ia tulaga sei vagana ua toe fai ni fuataga o faafanua i taimi o Peretania, ia ona suia ai loa laia i le tulaga fou lea ua i ai, ae ua uma ona tapena i ai le Matagaluega. Ma le faaaloalo.

**FOFOGA FETALAI:** Malie lau Afioga i le sui usufono mo Aana Alofi Nu. 3, sei toe tuu atu le avanoa i le Sui Palemia.

**Tofa Hon Fonotoe Nuafesili Pierre Laufo:** Lau Afioga i le Fofoga Fetalai e toe fesoasoani atu lava ona o le mataupu lea e laga mai e le sui usufono lea mo Aana Alofi Nu. 3, o mea ia sa saunoa ai nei le Afioga i le Minisita mo Galuega, mea foi ia ua fai mai nei o certificate of title, a, le computer folio lea a e fia maua le...fai sau search foi lele agai i o i le ofisa o fanua, ia o lona ua sau ai lava mo square mita ia le tele o le size o fanua, ua le toe....pei o le mea lea sa masani ai mo eka ma tulaga faapena, o pole, purchase, ia a o le mea la lea ua tele ina ou vaai atu ai i certificates ia ua

aumai nei, ia o la ua sau mo square meters, mea o kuata eka ma mea faapena, pe 1,000 ma ona tupu le square metre i le kuata eka ma tulaga o aoga. E leai ai fua se mea e taofia ai fua ia manatua o aoga ia e mafai lava ona faagasolo aoga a fanau aoga mo tulaga faatusatusa, o ituaiga fua mamafa eseese, ma o mea lava na e masani mai ai aoga i ia aso e aoaoina ai ia systems e lua o le imperial o le metric e faapena, e faatusatusa ia tulaga o ituaiga systems eseese, e le taofia ai aoaoina o fanau i na tulaga faapena. Lau Afioga i le Fofoga Fetalai o le faamalamalama lena.

**FOFOGA FETALAI:** Ia tulai mai le sui usufono mamalu e faauma mai le saunoaga.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai, faafetai atu foi i le Afioga i le Minisita ma le Sui Palemia mo le fesoasoani mai. O le faanaunautaiga lau Afioga ina ia aua ne i...e moni le saunoaga a le Sui Palemia ma Afioga foi i Minisita i le vaega lea e i ai nei, peitai ane lau Afioga o le Tulafono o lea e faapea mai, a faatinoina loa ua sui uma loa. O le mea lea afai o fanua na fua i tausaga o faaaogaina le imperial system, o lona uiga ua tataua ona toe ave e sui e convert uma ia, ae ou te talitonu e moni le saunoaga, o le alu alu agai i luma o le Tulafono, e faigofie ona fai fesuiaiga ia. O le atugaluga lea ma se tuualalo foi, ina ia aua....i vaega tau fanua, afai e i ai toe fuataga e fai i luma faaoga le system lea, ae aua ne i toe....pe mafai ona toe tagatagai i le Tulafono, ia aua ne i toe retroactive toe alu agai i tua e toe sui ia fanua o lo o i ai, o le vaega muamua lea.

O le vaega lona lua lau Afioga i le Fofoga Fetalai o lea e avatu ai se talosaga e alu lava i luga o le vaega lea, ina ia aua ne i....ou te talitonu afai o le finagalo lea o le tatou Malo, e moni foi o lou foi sui usufono ou te ioeina le fai o se official system, afai ua official metric system, 'aua tatou te....ia faataua i le Tulafono le official system lea o le a faaoga e tatou, ae 'aua tatou te faapea, fai loa lea, faasa uma loa isi vaega, ae ia faatagaina pea le avanoa pei ona saunoa le Afioga i le Sui Palemia, ia mafai pea ona aoaoina ma mafai pea ona faaaogaina ae ia convert as a official system e faaoga e tatou ia le metric lea, ona e taua e moni aemaise lava i atunuu i fafo i Amerika o lo o tele a tatou fefaatauaiga, ia a o le afifio atu foi o le mamalu o le tatou atunuu i atunuu ia, ia lea foi latou te faaaogaina. O le omai foi o i latou faipisinisi e oo mai i totonu o Samoa, a sau la i se tausaga o i luma ae sau se faipisinisi e sau ma le malamalama mai fafo i le system lea Amerika ma le imperial system, ae oo mai i se isi e feiloai pe faatalanoa foi se isi o eleele po o....

**FOFOGA FETALAI:** Malie le sui usufono o saunoa, sei tuu atu le avanoa i le faauilavea a le sui usufono mamalu.

**Afioga Afoafouvale John Moors (Palauli):** Lau Afioga i le Fofoga Fetalai, e leai se manatu e faalavelave i le saunoaga a lou uso a sui usufono, leaga o lea ua afea mataupu e uiga i se atunuu sa aoaoina ai au, ina ia mafai ona malamalama foi le tatou atunuu, o la e foi e aoao i Amerika le metric system, ina ia mafai ona fefaatauai ma atunuu uma i le lalolagi. Ma lou faaaloalo lava.

**FOFOGA FETALAI:** Malo faafetai fesoasoani mai. Ia faaiu maia le saunoaga le sui usufono mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga, o le taua tonu lava lea ua saunoa i ai le uso a sui usufono lea, ia mafai ona tatou malamalama i systems uma ia e i ai, afai foi i tausaga o i luma ae toe sau se isi system fou, ae o la tatou te malamalama, ae a tatou faatuatuanai nei i le isi vaega lea, e talitonu le agaga lau Afioga o se vaivaiga foi lea i alo ma fanau o le tatou atunuu i le alualu i luma o le latou foi iloa aemaise lava i fefaatauaiga ma feiloaiga foi ma isi atunuu o le lalolagi, faafetai.

**FOFOGA FETALAI:** Malo, faafetai saunoa. O le a avatu le avanoa i se tasi o sui usufono mo Salega, Afioga Afualo Wood Uti Salele, ia ona faasolo atu ai lea i nisi o sui usufono i lea itu o le Maota.

Tulai mai se tasi o sui usufono mo Salega, Afioga Afualo Wood Uti Salele.

**Afioga AFUALO WOOD UTI SALELE:** Faafetai i lau Afioga i le Fofoga Fetalai, faafetai mo le Tulafono ua taoto nei i le Maota. Ua faaalua foi le tele o manatu atonu ua siisii foi le tai ona o le eseese o talitonuga, ia ae tasi lava le auga, tasi lava le faamoemoe ina ia maua se fua e taula uma i ai ia le fuaina o vaega uma o lea e faaoga nei e galue ai le tamaoaiga, aua o le auga atoa lava lea. O le agai i le faataugofieina o le tau o le soifuaga aemaise lava ia fefaatauaiga. A fua foi i le gagana, sa ou vaavaai ma le totoa i le Tulafono Tau Faaofi, e ese le oa o le gagana Samoa ona o le tele o upu ia e i ai i nei, o upu faa-Peretania uma e leai ni upu Samoa. E lua lava fua ia e faataoto mai i nei, o le fua lea ua taua nei o le materika po o le metric system lea ua tele ina faaoga ne i i le lalolagi atoa, ma le isi fua lea ua silafia o le imperial lea e faaoga ai le pauna ma le futu. A o ia lava fua, e i ai upu ua uma ona fua i ai le mamafa, e fua i ai le vevela ma e fua i ai le malosi o le eletise ma o le oa ia. O lea foi ua uma ona faa-Samoa, o lea ua faaliliu mai ma ua atili ai ona tamaoaiga le gagana Samoa i fua uma nei e lua. O lau vaavaai ma le tilotilo i ai i le sao o fua nei e lua i le gagana aua o le gagana o se vaega lea e ola pea, a o lea la ua aumai nei le Tulafono Tau Faaofi o le a aveesea ai le isi fua, a o i ina lea e puaina mai ai le tele o isi gagana ia e faaoga e le gata i le aufai lauga i Faafeagaiga a o aiga uma e tai pei o le pauna. O lona uiga o le faamoemoe lea e i ai i le lumanai, e le toe faaogaina ia gagana. O lou atugaluga la i ai ma lou popolega i le taua tele o nei vaega, aua o mea uma lava nei o atinae uma nei ma fuafuaga i le poto salalau ina ia mafai ona mautinoa ua agai pea i luma.

O le faaogaina foi la o le fua lea ua tatou agai i ai, o se fuafuaga lelei. A o le fautuaga lau Afioga i le Minisita se i e silasila pea i ai aua e leai lava se eseese o fua ia e lua aua o lea e eseese ma gagana e lua ia e faaoga e tatou o le gagana Peretania ma le gagana Samoa lea e aoao uma. E moni lava o le gagana Samoa lea e pei ua taula i ai le tele, a o le gagana Peretania lea e faaoga e fai ai fefaatauaiga. E leai foi la se mafuaaga tele ou te talitonu ai o le a fai se Tulafono e matua tineia ai le faaogaina o le isi fua lea na tatou aoga mai ai o pauna, ae ia tapena lelei.

Ou te manatua foi a o ou aoga au ia, e lua lava mea na aoao, ta te taumafai foi e faaliliu, a o le oa foi lena ma le tamaoaiga aua o lea ua e aoao i vaega

uma nei e lua, ae ia tatou agai pea i lalo i le vaega lea o lea ua faaaoga mai aua o lea ua i ai le fua lea ua tatou alu ai nei o le mita. Aua o isi upu mo se faataitaiga, a fua nei le eletise o isi upu aua o lea e faaliliu mai i le faa-Peretania o le joule, a o lea ua ou vaai atu nei i le faa-Samoa lea e i ai nei o le toule. Ou te le iloa po o sao le faa-Samoa aua o upu nei aua o lea ua maea ona tapena le Komiti foi lea o le Gagana Samoa ina ia fesootai lelei ma latou po o ua sao le faaliliuina o nei upu. E moni o upu o lea e aumai mai totonu o le faa-Peretania i le technical language lea e faaaoga, ae ua aveia ma sao i le tatou gagana. Ua atili ai ona ola ma oa le gagana Samoa e sapi ai faleupolu. E le gata foi i lea a o le Auaifaluga a le Atua o lo o gafa ma le talaiina o le Tala Lelei.

O lau tatalo atu i lau Afioga i le Fofoga Fetalai e ala atu i le Sui Palemia, o se Tulafono Tau Faaofi ou te lagolagoina, ae se i toe silasila i ai ina ia aua ne i tapeina aua o lea ua ola aua ua na o se vaega lava e aumai, ae faamuamua pea aua o le Tulafono Tau Faaofi lea ia taula i ai fuataga a le atunuu i so o se tulaga, ae ia tumau pea le aoaoina o fanau ina ia mautinoa lelei ua tomai i vaega uma nei. Aua o isi o a tatou fanau o lea e autovaa atu i Amerika Samoa ma Amerika ma isi vaega o lea e faaaoga tele ai le isi vaega lea, a o le tele lava o le lalolagi o lea ua agai lava i lalo i le Tulafono lea ua tatou i ai nei. Ou te lagolagoina tele la, ae pei na o sina fautuaga lena i lau Afioga i le Sui Palemia ina ia silasila totoa i ai, aemaise lava la ina ia fesootai ma le Ofisa o Aoga ina ia mautinoa lelei ua tau le manulauti lea ina ia malamalama lelei alo ma fanau i le aoaoina aemaise foi o le faaliliuina o upu nei i le gagana Samoa, ae ese le tele o upu nei iinei ina ia mautinoa lelei ua oa pea le tatou gagana, ae aua ne i aveia o se gagana e amata nei ae toe uma taeao i a tatou Tulafono Tau Faaofi faapea.

O le fesoasoani atu lea lau Afioga i le Fofoga Fetalai ae faafetai tele lava mo le avanoa.

**FOFOGA FETALAI:** Faafetai i le faatofalaiga, faafetai foi i fautuaga va tuuina mai i le Tulafono Tau Faaofi.

O le avanoa mulimuli o le a tuuina atu i le sui usufono mo Faasaleleaga Nu.4 ona tali ai lea o le Afioga i le Minisita e a ia le Tulafono Tau Faaofi.

Tulai mai le sui usufono mamalu.

**Afioga PESETA VAIFOU TEVAGA:** E momoli aku le faafekai i lau Afioga i le Fofoga Fekalai. Ua ou kulai aku e kau fai se magaku oga e kau faamalamalama ai lelei Kulafogo Kau Faaofi oga o gisi lava o kulaga ia e pei oga aumai oga o fua gei.

Lau Afioga i le Fofoga Fekalai, e makua lagolagoiga lava e lou sui usufogo le Kulafono Kau Faaofi lelei, ae pau lava lea o se kuuallalo a lou gei sui usufogo. E pei foi oga saugoa gisi o sui usufogo mamalu o le la Iku o le Maoka, ia aua ge i pa puipui pe faagaka isi fua mai isi akuguu e pei o Amerika.

Lau Afioga i le Fofoga Fekalai, a silasila foi i a kakou meafaigaluega ia e aumai mai la akuguu, e pei la o le measurement tape e fuku le isi iku, ae sau le isi iku ua metric. O loga uiga o le kele ia o le kaua o le mea lea o le kaumafai pea o alo ma fagau o lo kakoua akuguu e aoaiga pea le kulaga lea e i ai le fuku po o le kaloge ma fua faapega.

O se isi lava kulaga e ese le faigaka o le a oo i ai le makaupu lea, e pei la oga saugoa gisi o sui usufogo i kagaka sa fagagau ma ola mai Amerika. O le koakele foi o le kakou Maoka sa i ai foi i lea akuguu ma o alo la ma fagau sa fagagau i Amerika ma omai i igei faaaoga i igei, o se kaimi koe foi aku i akuguu ga omai ai, e makua faigaka lava. O loga uiga e o aku foi e le malamalama lakou i le metric, aua e pei oga kakou kalagoaina o le akuguu lea o Amerika o lana ia lava fua lea e pei o le fuku ae fou gei le kulaga lea ua i ai. A fua foi la i gagaga ma sikolasipi ia ua ave i isi akuguu e aoao ai le faa-Saiga, o le faa-Iapagi, e pei o le kasi lea mea e kilokilo i ai lo kakou Malo oga e kakau lava oga aoaiga so o se mea.

Sa saugoa foi le Migisika mo Aoga i le Kulafogo Tau Faaofi lea ma Kusi Pasi foi ia ua mafai ona kuuina aku i kamaiki e mafai ai ona maua a lakou galuega i isi akuguu o le lalolagi. E magaia ia fuafuaga, a o le faigaka la, afai la e alu aku gei o lea e aoao legei kamaikiki i le metric only ae alu aku i Amerika, o le faigaka foi ia ona faakigo ia ikuaiga galuega ona e ese foi le fua la e faaoga e la akuguu. O le kuualalo la i lau Afioga i le Migisika ma le Makagaluega e leai e lagolago lava e lou gei sui usufono le suiga, ae ga ona.....

**FOFOGA FETALAI:** Malie le sui usufono se i tuu atu le avanoa leaga o lea na taua le Afioga i le Minisita mo Aoga, Taaloga ma Aganuu.

Tulai mai le Minisita mo Aoga, Taaloga ma Aganuu.

**Afioga Hon Magele Mauiliu (Minisita mo Aoga, Taaloga ma Aganuu):** Lau Afioga i le Fofoga Fetalai, o le faigofie ia o le aoaoina o le metric i tamaiti ia e aoga nei e le faigata. E leai la se mea e popole ai le sui usufono faapea i le iloa faaliliu i le isi itu, a o tamaiti ia e i ai nei o le matua maai lava o mafaufau, o le faigofie ia.

Faafetai lava i lau Afioga i le Fofoga Fetalai mo le avanoa.

**FOFOGA FETALAI:** Tulai mai le sui usufono mamalu o lea e maua e faigofie.

**Afioga PESETA VAIFOU TEVAGA:** O le a le finau i le Afioga i le Minisita, ae pei lava ona ou talosaga atu ma le agaga maualalo i le Afioga i le Minisita e ana leni Tulafono Tau Faaofi, se i toe silasila ane lava ona ia te au lava ia ma sou lagona, o le taua ia ae atamai le tamaitiiti i so o se fua, ia ao so o se mea. A nofo nofo i inei i Samoa ua leai se galuega alu i isi atunuu, a o la e alu atu e ese foi fua a na atunuu. Ia faaoga a lakou fua ae kuu a kakou fua.

Ma lou faaaloalo lava.

**FOFOGA FETALAI:** Tulai mai lau Afioga ia le Sui Palemia o lea ua maea saunoaga a sui usufono mamalu.

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai. E manatu ua manino vaega uma ma o lea foi ua taoto fautuaga mai sui usufono taitasi.

O le tulaga lava ia tau aoaoga e leai se mea o suia. Sa ou aoga foi au ia i inei i Samoa ae ou te le i aoga i se isi atunuu ma sa aoaoina uma lava i fua e lua. O le Tulafono Tau Faaofi la leni e leai lava se mea o noatia ai fua le

Matagaluega o Aoga, Taaloga ma Aganuu mai le tulaga i le aoaoina o ia fua e lua ma pe i ai ma nisi ituaiga fua ina ia faalatele ai le malamalama o le fanau aoga. O le taua o lenei mea, o iinei lea ua tulai mai ai ua matua matautia le tulaga ua i ai lo tatou atunuu ona o se atunuu ua aoaoina uma i fua e lua. E taua aua a alu i Niu Sila ma Ausetalia o la e malamalama, a alu i Amerika o la e malamalama i le metric po o le imperial e malamalama. O le taua lena o le tatou Tulafono Tau Faaofi lenei, a o le tulaga i le gagana e sao le saunoaga a se tasi o sui usufono mo Salega, Afioga Afualo Wood Uti Salele. O le tele ia o upu fou i totonu o le Tulafono Tau Faaofi lenei i le gagana ona e pei o ni upu Peretania isi upu, a o isi upu e pei o ni upu e maua mai i le gagana Sepania ona e pei e tau fefiloi foi lele. O upu la na e le i i ai ni upu Samoa muamua e faaliliu i ai mai upu na. O le tulaga la lea e pei ona saunoa i ai le sui usufono i le oa e fesoasoani i ai ina ia atili oa ai le gagana Samoa i upu eseese ma e taua tele le vaega lea.

O lea foi ua i ai le tatou Komisi o le Gagana Samoa e silasila foi latou i ai, ae ua aumai i le Tulafono Tau Faaofi lenei sa galulue ai nisi mai gauta i le Ofisa Faaliliu Upu a le Palemene ma nisi o le Matagaluega ma i latou o lo o faiaoga i le matematika e tau felataai le tulaga i gagana ma formula ia. O i latou na sa tilotilo ma fai ai le galuega, ae leai se mea e noatia ai le Komisi o le Gagana Samoa e toe silasila foi latou i ai ma toe lauliliu vaega nei ina ia fetai ma talafeagai. E le mafai foi ona toe aveesea le gagana lea ua faaoga i le imperial system o lea ua tumau o se vaega o le gagana Samoa. I lou foi talitonuga e le mafai ona toe aveesea aua leaga o la foi e faaoga i isi taimi.

E pei o le tulaga lea lau Afioga i le Fofoga Fetalai e faamaea atu ai nai mataupu ia na laga mai e sui usufono mamalu, a o lea e i ai le Komiti Filifilia a le Maota e toe silasila ma tagatagai i ai ona i ai foi lea ma le tatou transitional period. E le faapea o le a pasia ona ave loa lea faamamaluina le Tulafono Tau Faaofi. E i ai le taimi tele lava lea se i toe talatalanoa ai foi ma le aufai oloa ma nisi foi o le atunuu aua le faamautuina. A ua tapena loa ma sauni o le a faamamalu, ona faamamaluina loa lea o le Tulafono.

**FOFOGA FETALAI:** Faafetai i lau Afioga i le Sui Palemia mo le faamalalamalama.

*Na faamaonia le lafo ma faitauina le Tulafono Tau Faaofi o Faatulagaga Faaletulafono o Fua o le Mamafa ma Fua Eseese o Oloa 2014 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa mo le iloiloaina ma toe lipoti mai i le Fono Aoa o le fonotaga o Iuni 2014.

O le a lafo atu ia i lau Afioga i le Taitaifono Leaupepe ma la outou Komiti o le a outou soalaupule nei Tulafono Tau Faaofi ona toe tuuina mai lea i se taimi talafeagai i lo tatou Maota.



**TULAFONO TAU FAAOFI O FUAINUMERA FAAMAUINA**  
**2014 – faitauga faalua**

**FOFOGA FETALAI:** Mo le silafia e le Palemene o le Tulafono Tau Faaofi leni sa faia lona faitauga muamua i le aso fono 24/1/2014.

I le toesea ai o le Afioga i le Palemia ou te tapa lau Afioga i le Sui Palemia e tulai mai.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai i le toesea ai o le Afioga i le Palemia ou te faatu le lafo, *Ina ia faitauina nei le Tulafono Tau Faaofi o Fuainumera Faamauina 2014 i lona faitauga faalua ma ou te fia tautala faamalamalama i ai.*

*Faaluaina e le Minisita mo Tupe Maua, le Minisita o Tupe ma le Minisita mo Fesootaiga ma Faamatalaga Tekonolosi.*

**FOFOGA FETALAI:** Tulai mai lau Afioga i le Sui Palemia e saunoa.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, o le tasi leni Tulafono Tau Faaofi ua tuuina mai i luma o le Laulau a Fono ma o se Tulafono Tau Faaofi na fanau mai i se poloketi o lo o faagasolo nei a le Matagaluega, le Matagaluega o Fuainumera Faamauina. O se Tulafono Tau Faaofi la leni e toe tuufaatasia ai ma toe faamalasia ai vaega esese o le tatou Matagaluega, ma soloia ai le Tulafono tuai sa pasia i le 1971 ma ua tele tausaga, ua tatau foi ona fai se isi Tulafono Tau Faaofi fou e faapena ona aafia ai ma le tele o suiga ua oo mai i leni vaitau ua tatou i ai.

O le faamoemoe autu lena o le Tulafono Tau Faaofi, ma o le tiute tauave lava o le Matagaluega o le aoina mai o faamatalaga. O le tulaga tutoatasi o le faamauina o fuainumera a le Malo i le aoina mai o faamatalaga mai le atunuu, ua faapena ona faaaoga e fauina ai a tatou faiga faavae.

E faapea foi i le tulaga o agatapuia o faamatalaga e aoina mai, e tatau foi ona puipuia e le Matagaluega le tele o nisi mau faamatalaga, a o faamatalaga lava ia e fitoitonu ma aoga i le faatinoga o faiga faavae ma silafia foi e le atunuu, i tulaga ua i ai pei o se faataitaiga o le atinae o le tatou nuu, ia tasi lena tiute tauave a le tatou Matagaluega leni.

Ua faatulagaina foi leni Tulafono Tau Faaofi e le Ofisa na faatino se isi faitauga aloaia o le faitauaofai o le tatou atunuu i le tausaga 2016 ma faapena ona faaaau ai tai lima tausaga i le agai atu i le lumanai.

O le tulaga foi i le faamalasia o pepa fanau i le Ofisa fai pepa fanau i e maliliu ma faaipoipoga, o i ina foi o lea ua i ai le tatou lala lena ma o le Tulafono Tau Faaofi foi leni e faatulafonoina ai le ave o le Ofisa Sili o le Matagaluega ma Resitara Autu o le tatou Ofisa o pepa fanau faapea e maliliu ma faaipoipoga, le faamaumauina o na foi tulaga faapena.

O se Tulafono taua foi leni Tulafono Tau Faaofi ona ia toe tuufaatasia ai le tatou Matagaluega, ona e manatua foi lau Afioga, o le vaega lea o le faamauina o e fananau, maliliu ma faaipoipoga, e lei i a ii lalo o le Matagaluega leni. E lei leva tele atu nai tausaga na faasee mai ai i lalo o le Matagaluega leni, ma o le Tulafono Tau Faaofi leni o le a faatulafonoina uma ai le vaega lea mo le agai i luma.

O le faamatalaga lea lau Afioga i le Fofoga Fetalai e tusa ai ma lenei Tulafono Tau Faaofi.

**Tofa Lealailepule Rimoni Aiafi:** Lau Afioga i le Fofoga Fetalai....

**FOFOGA FETALAI:** O le a se isi mea lau Afioga i le sui usufono mo Faleata Sisifo?

**Tofa Lealailepule Rimoni Aiafi:** Lau Afioga e fia fai se manatu i le Tulafono Tau Faaofi pe a tusa ai ma lou finagalo.

**FOFOGA FETALAI:** Ua uma le taimi lea na avatu e fai ai lauga.

**Tofa Lealailepule Rimoni Aiafi:** Lau Afioga o lea ua uma ona saunoa le....

**FOFOGA FETALAI:** Ia e faamalulu atu, ua laaloa le vaai faapea ai ua filemu le tatou Maota. Ia, tulai mai le sui usufono mo Faleata Sisifo.

Oi ia, sei muamua mai la lou uso le sui usufono mo Faleata Sasae, muamua mai Commander.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai faafetai foi i lau Afioga i le Minisita ma le Matagaluega i lenei Tulafono Tau Faaofi taua.

Muamua, e momoli lau faamalo i le vaega lea o le Matagaluega, o le taua ia o le galuega a lenei Matagaluega, talu mai lava i le taimi na amata ai seia oo mai lava i lenei vaitaimi i le faamaumauina o fuainumera i so o se ituaiga vaega o le atunuu. E ese le taua, e taua ia tatou nei o lo o fai ma sui o itumalo, e taua foi i tagata o lo o vaaia le tamaoaiga o Samoa, e taua foi i so o se vaega eseese o le atunuu lenei faamaumauga a le Matagaluega.

E tasi lava le vaega ou te fia fesiligia i le Tulafono Tau Faaofi lenei, i lalo o le Tulafono Tau Faaofi lenei, o lo o i ai se vaega e fetuunai ai le Pule o le Matagaluega fou lea o le SPS ma se Pule o se isi Matagaluega pe a manaomia la e le Matagaluega lea fuainumera ma faamaumauga o lo o i totonu o lenei Matagaluega. O lea la e faapea mai le Tulafono Tau Faaofi, e mafai ona teena e le Pule o le Matagaluega lea le vaega lea ona tuu lea i le Minisita. Afai la e le manao foi i ai le Minisita o le Matagaluega lea ma le Minisita o le Faalapotopotoga lea, ona ave lea o le mataupu i le Board. O i la lea ou te fia maua ai se malamalamaaga i le vaega lea. Pe aisea o le a ave ai le mataupu lea i le Board lea, ae a tagai i le Board, o lo o i ai le CEO o le Matagaluega lea e musu e faatino le galuega, o lo o i ai foi ma le sui o le Minisita o lo o i ai i totonu o le Board lea. O lona uiga e tele lava le conflict of interest e i ai i le vaega lea. E i ai la lou manatu i le Tulafono Tau Faaofi lenei, e tatau ona toe tagatagai i ai, pe aisea le mea ua toe refer ai le mataupu lea pe afai e feeseeseai le Minisita o le Matagaluega lea o Fuainumera Faamaumauina ma le Minisita o le Matagaluega lea e manao le Minisita mo Fuainumera i faamaumauga, pe aisea e toe ave ai i le Board a le vaega lena ae le ave i le Kapeneta po o se isi vaega e independent le latou manatu i lo le toe ave i le latou Board.

Na pau lea o se vaega o le Tulafono Tau Faaofi ou te fia fesili i ai, ae o le Tulafono e manaia le Tulafono Tau Faaofi o lea sa tutoatasi ai foi le vaega o lea auaunaga i totonu o le atunuu ona e ese ma le taua o lenei auaunaga.

Na pau lea o se vaega ou te fia fesili ai lau Afioga i le Fofoga Fetalai aemaise o le Afioga i le Minisita.

**FOFOGA FETALAI:** Malo saunao. Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga mo le avanoa. E taua tele lenei Tulafono Tau Faaofi, ona tasi lenei Matagaluega aupito sili ona taua o le Malo. Ia manatua foi o le Matagaluega lenei mai tausaga ua tuanai sa toe tuu i lalo o le Matagaluega o Tupe. Peitai, sa tele foi ni finagalo sa faaalai i ai, na toe filifili le Malo e ave e faatutoatasi ona o le taua o lana galuega, aua o i e fua uma i ai fuafuaga o le tamaoaiga. O fuafuaga alualumamao ma atinae a le atunuu, e fua mai i faamaumauga nei i le moni ma le faamaoni la me tutoatasi.

O lea e momoli tele atu ai le faafetai i le Tulafono Tau Faaofi lea ua tuuina ma ii le faamalosiaga ma le malosiaga e malosiaga e ave i lalo o lenei Matagaluega i le aoina o fuainumera. E le gata i le aoina a ia mautinoa le saogalemu, confidentiality o nei fuainumera ma faamaumauga. O lea ua matua manino foi i le Tulafono Tau Faaofi le Oath po o le tautoga a i latou e galulue ai, ina ia aua nei mama i tua faamaumauga nei aua e taua tele, aemaise i totonu o le tatou atunuu aua e toagaogao ma laiti ma aafia ai le tele o tagata i faamatalaga avese ma tulaga faapena i faamaumauga nei e patino lava i le tagata ia. E le gata i lea, o lea ua tuu manino i a ii lalo ma le vaega lea o aso fanau ma e maliliu. O faamaumauga uma nei, o vaega taua uma nei o lea e momoli ai le faafetai i lenei Tulafono Tau Faaofi ma ave i ai le lagolago tele i le faatulai mai o lenei Tulafono Tau Faaofi taua.

Na pau le mea e fia fai ai se manatu, muamua, o le isi vaega taua lea e sau i i, o le filifiliga lea ma le malosiaga ua ave i le pule e tofia ai e ia lana auaunaga e amata ma ii le ACEO. O le tainmi lenei, nei tei ua i ai se feteenaiga ma le Tulafono a le PSC, o A CEO, o lea e ave agai i le PSC le malosiaga lea, ae ua faafetai o lea ua manino ma ii lalo o le Tulafono Tau Faaofi lea, o le malosiaga ma le filifiliga o tagata e amata mai le ACEO level, o lea o le a taatia mai i le Matagaluega na te faia. E le o po se lilo, o lo o i ai se faaletonu o tulai ma ii le taimi nei. E le fia oo se faamatalaga o lena ua avatu manatu e tusa ai o nei filifiliga i le tele o le afaina o Matagaluega aemaise o le Matagaluega lenei i le tulaga o i ai le filifiliga o nei avanoa. Aua o le mea moni, e fanau mai le Tulafono Tau Faaofi lenei i le ISP lea faatoa uma atu nei a le Matagaluega o Faamaumauga e lei leva ona uma atu. O lona uiga o i latou o lo o i a ii le taimi lenei ua i ai le tovaa ma le atamai faapitoa faaopopo, talu mai aoaoga faapitoa a consultants na omai fafo e galulue ma tatou e faamalosiaga le Matagaluega lenei. O lona uiga, afai e i ai nisi ua ave faamalosiaga ma nei tofiga, ua maumau atoa tupe a le Malo na invest i tagata nei ina ia siitia lo latou tomai.

O le vaega la lea e manino mai i le Tulafono Tau Faaofi, e ave lau lagolago tele pe a faapea o suiga fou nei ua i ai, o suiga lelei nei, ma ua tatau foi ona tuu i tua i Matagaluega nei mea o le filifiliga o ana tagata faigaluega e faatino lelei e latou, o lo o i ai ia i latou le poto ma le tomai e filifili aim ea nei. E le

gata i lea, nap au le popolega i le mea lea e feeseeseai a ii le isi vaega o le Tulafono Tau Faaofi, o le filifilia lea e le Minisita o le Taitaifono o le Komiti Faufautua le advisory board. O lea e manino i le Tulafono Tau Faaofi, e filifilia e le Taitaifono mo le tolu tausaga, ae filifilia tagata o le Board na o le tailua tausaga. O le mea la lea e fesili ai, pe aisea ua tai lua tausaga ai le Komiti Faatonu po o le advisory board lea, ae tolu tausaga o le Taitaifono. Po o le mea e tolu tausaga, a uma loa le lua tausaga malolo le Komiti ae ua lava na o le Taitaifono e fono na o ia. A o le mea la lena o lea e fia fesili ai, pe leai se suiga ina ia talafeagai le umi e i ai le Taitaifono ma le umi o lana Komiti. A o isi vaega uma, o lena e talafeagai le tuuina mai. E fia fesili foi i tausaga e tele sa i ai le sootaga faapitoa lea a tatou ma le Malo o Iapani, e ave ai i tausaga tagata mai le Matagaluega lenei e ave e aoaoina faapitoa mai le atunuu lea o Iapani. E tasi lenei atunuu o lo o aupito taulamua i mea nei o faamaumauga. Po o faaauau pea lea galuega lelei aua lava le faaauupegaina o tatou tagata lea e i ai nei i lenei Matagaluega.

A o vaega uma, e momoli le faafetai i le Matagaluega, aemaise o lea e lei leva atu nei le faitauaofai o le tatou atunuu. Na pau lava le mea e popole ai, e seasea i ai se suiga tele, pe o a tonu mafuaaga, aua e tatau ona manino tatou i mafuaaga e ala ai ona leai se fesuiaga tele i le lima tausaga. O lea lava tatou te iloa i tagata femalagaai i fafo ma tagata maliliu, ae ua leva tausaga o tumau le tatou faitauaofai i lea vaega.

O le isi vaega, o lea ua i ai ma le malosiaga e faitaua ai ma mea tau faatoaga ma mea na, ae pei e lei umi tele, e taisefulu tausaga lea e faatulafonoina mai e fai ai faitauga ia o faatoaga. E lelei foi le fetuunai mai i lalo i le lima tausaga pe fai faatasi ma se isi galuega a ua mamao tele le taisefulu tausaga i lou talitonuga, aemaise lava o faatoaga o lo o naunau tele tatou ina ia faatamoe le atiaieina.

O nai manatu ia lau Afioga i le tatou Tulafono Tau Faaofi e lagolagoina ai ma nai motugaafa e fesoasoani i mea o lo o vaivai ai e toe faaatoatoa. Ma le faaaloalo lava. Faafetai.

**FOFOGA FETALAI:** Malo faafetai faasoa. Ia, o le a tuu atu le avanoa i lea Itu o le Maota. Tulai mail au Afioga i le Sui Fofoga Fetalai.

**Tofa AGAFILI PATISELA ETEUATI TOLOVAA (Palauli Sisifo):** Faafetai i le avnoa i lau Afioga i le Fofoga Fetalai, e faaali ai foi se lagona ma se manatu e tusa o lenei Tulafono Tau Faaofi. Faafetai i le Minisita faapea foi le Faamau Fuainumera a le Malo ma le Matagaluega e tusa ai o lenei Tulafono Tau Faaofi.

O le Tulafono Tau Faaofi fou lenei, ou te talitonu e fou le Tulafono ae o ona matafaioi autu o matafaioi lava ia na faavae mai ai le Matagaluega nei, ma e faafetai tele o lea ua tuufaatasia ma nisi Tulafono ina ia faigofie ai le faatinoina o le galuega.

Ou te fia tautala faapitoa lava i le vaega lea o le faamauina o pepe fananau mai, tagata maliliu ma faaipoipoga. A o faagasolosolo le fetuunaiga o galuega fai a le Malo, reforms, o le 2002 na pasia ai le Tulafono lea o le Faamauina o Pepe Fananau Mai, Tagata Maliliu ma Faaipoipoga 2002. I le taimi lea o i lalo o le Matagaluega o Faamasinoga le vaega lea o le faamauina o pepe fananau. Mai le taimi lena e oo mai i le taimi lenei, ua tolu Matagaluega e fetuunai ai le vaega lea o le faamauina o pepe fananau mai, tagata maliliu ma

faaiipoipoga. A o le faatinoina ma le faagaioiga o le vaega lea o le Tulafono, ou te faafetai o lea ua faatulafonoina le Resitara. Ma o le taimi lea o le 2002 na pasia ai le Tulafono, o le Resitara la o lo o tusia ai, o le Ofisa Sili o Pulega o le Matagaluega o Famasinoga. O le Resitara lena o la e i a ii le taimi lenei, sau i le Matagaluega o Tupe o lea ua toe foi i le Ofisa o Fuainumera Faamauina, o le Tulafono tuai lava lena o lea e faaoga. Ae faafetai o lea ua faatulafonoina, o lea ua tuu le Resitara aoao i le Ofisa Sili o Pulega po o le Fuainumera Faamauina a le Malo, lea ua i ai le Resitara i le taimi lenei. Ae faafetai foi o lea ua i totonu o le Tulafono Tau Faaofi lenei le avanoa e mafai ona ia tuua le malosiaga i le tagata o lo o faauluulu i ai le Ofisa i le faamauina o pepe fanau mai, tagata malilili ma faaiipoipoga, e faatino ai le galuega i lalo o le ulutala o ia o le Resitala. E Resitala aoao le Pule ae Resitara le ACEO o le Ofisa o pepa fanau po o pepe fanau mai, tagata malilili ma faaiipoipoga. Faafetai o lea ua faatulafonoina aua o le taimi lenei o le Resitara aoao lava o la e i totonu o le Tulafono 2002, o le Ofisa Sili o le Pulega o Faamasinoga ae o lea la ua faatulafonoina mai i le Tulafono Tau Faaofi lea e i ai nei. Faafetai foi o lea ua ou tilotilo atu ai i i o le tele o suesuega po o **surveys** lea e fai, o lea o le a fai uma lava i lalo o le Matagaluega lea. Faafetai atu ai ma e lagolagoina ai le Tulafono Tau Faaofi. Ma le faaaloalo.

**Afioga TOEOLESULUSULU CEDRIC POSE SALESA SCHUSTER:**  
Lau Afioga i le Fofoga Fetalai....

**FOFOGA FETALAI:** O le a tuu atu le avanoa mulimuli le sui usufono mai Aana Alofa Nu 3.

**Afioga TOEOLESULUSULU CEDRIC POSE SALESA SCHUSTER:**  
Faafetai i lau Afioga i le Fofoga Fetalai mo le avanoa. E avatu foi le faamalo a lenei sui usufono i le Afioga i le Minisita aemaise le Pulega po o le Matagaluega i le tapenaina o lenei Tulafono Tau Faaofi. E ioe ma talitonu le agaga ua talafeauga le faatuina o lenei Pulega ae le gata i lea o nisi foi o vaega o tuu i ai i totonu o lenei Matagaluega fou.

Na pau nai fautuaga lau Afioga i le Fofoga Fetalai, ona e talitonu o se tasi o vaega taua i lenei Matagaluega o Fuainumera Faamauina po o le harmonize ina lea o le tele.....o le taimi nei lau Afioga i le Fofoga Fetalai, e i ai atugaluga ona o le tele o nisi o Matagaluega po o Pulega e eseese a latou data o lea e collect, ia e eseese foi la ae talitonu o le fautuaga ina ia mafai ona faamalosia i totonu o le Tulafono Tau Faaofi lenei le i ai o se avanoa o le Matagaluega o Fuainumera, latou te galulue ai ma Pulega ia ina ia faia aua e maitau atu o i latou o le a faigaluega i nei Pulega ua qualify i mea tau statistics i le faiga o survey, ao le faiga o data o lo o collect ai e nisi o Matagaluega po o Pulega foi atonu e le o atoatoa foi i le vaavaaiga faafuainumera ma e talitonu o le agai i luma aemaise lava i Lipoti ua tuuina mai i totonu o le tatou Maota ae le gata i lea o fuainumera foi o lo o avatu i atunuu i fafo, e tele lava le discrepancy i nisi o tatou fuainumera ae talitonu e talosagaina ai le Matagaluega ina ia malosi se latou fesoasoani ia i latou i totonu o isi Matagaluega e fia faia ni a latou survey. O se tala faataitai lau Afioga i le Fofoga Fetalai, o le taimi nei e ese le data e aumai e le Matagaluega o le Airport Authority i tagata o mai i totonu o Samoa ese le data e aumai e le Pulega o Tagata Tafafao Maimoa Mai, ese le data e aumai e le

immigration. E taua tele le galulue faatasi, talitonu a i ai se fesoasoani foi a le Ofisa o le Statistic ina ia talafeagai ma fetauti ia information lea e collect i nei vaega eseese e maua ai se overall data e talafeagai mo le tatou atunuu.

**FOFOGA FETALAI:** Malo . Tulai maia lau Afioga i le Sui Palemia e talifuitau i mea na laga i saunoaga a sui usufono mamalu.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai o talosaga lava ia i le auina atu e le Minisita o le Matagaluega i le isi Minisita o se isi foi Matagaluega, e talitonu lava afai lava o talosaga e faavae i luga o mafuaaga tatau e leai se mea o le a teena ai fua le talosaga. O tulaga masani na. E leai foi la se mea o le a oo ai fua i le Board. Ou te talitonu foi e leai se conflict of interest e i ai i le tulaga pe a oo i le Board. O le Taitaifono e tolu tausaga pei ona aumai e tailua tausaga ia sui o le komiti po o le advisory committee lea sa taua, e taua le faasili o le tausaga lena e tasi a le Taitaifono ina ia i ai le continuity ina ia faaauau pea. Ae manatua foi silasila lelei i le Tulafono o lena foi e i ai le faaupuga e mafai ona toe reappoint, pe mafai ona toe filifilia sui o le komiti e toe faaauau foi i se isi foi lua tausaga. O lona uiga o lena lava e i ai lava le tulaga lena ia mafai ona faaauau pea ia komiti ia faatasi ai ma le Taitaifono ina ia aua nei faaletonu le faagasologa o galuega.

**Tofa LEALAILEPULE RIMONI AIAFI:** Lau Afioga i le Fofoga Fetalai.....

**FOFOGA FETALAI:** Malie lau Afioga i le Sui Palemia sei tuu atu le avanoa i le faauilavea a le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga i le Sui Palemia pei lava o le mea lea e masani ai tatou po o le mea lea e fesili i ai o le inconsistent o le Tulafono ona o lea o le tele lava o Tulafono e auai mai e taitolu tausaga. Ou te talitonu o le taimi foi lena e lava ai le tomai o le tagata o lava sona sao, sona silafia i galuega fai o le tolu tausaga. O le tele foi o Tulafono ia ua aumai e tai oo lava i le ono tausaga ona ave lea o se avanoa e malolo ai. E pei o le tulaga lea i le faatele galuega i le Matagaluega i le tailua lea o tausaga, ae tolu tausaga le Taitaifono. O le isi mea o le fono a le komiti lea e faamanino mai i i, o lea e faapea e fono faa-tasi i le tausaga. po o le mea la e i ai se aoga o lea komiti pe a, e faa-tasi i le tausaga lea e faatulafonoina po o nisi fonotaga sa ou faapea e taitasi i le masina. E pei o nai fesili ia, afai la e leai se moomiaga e leai foi la se mea e tuu ai i totonu. Ma le faaaloalo lava.

**FOFOGA FETALAI:** Tulai mai lau Afioga i le Sui Palemia e faaauau le tali atu.

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai. O le tali atu lena afai lava e toe filifilia foi sui mo le isi lua tausaga, uma lena lua tausaga toe filifilia mo le isi lua tausaga e au lava i le ono tausaga. E faapena foi le Taitaifono a toe filifilia foi e faaauau, ia e au lava i le ono tausaga. O tulaga na e i ai vagana ua i ai ni mafuaaga tatau

pe ua fia malolo foi se sui ona faapena lea ona i ai se suiga o tulaga e pei ona tulai mai. Ao le vaega ia o le galulue faatasi o Matagaluega nei, o lo o galulue faatasi i le taimi nei o lo o faapena ona maua ai i le tatou Matagaluega lenei faamaumauga foi nei tau Immigration i le tulaga lea o tagata ulufale mai i totonu o le atunuu. O lo o maua foi e i latou faamaumauga a le au turisi ma latou tafafao maimoa mai i Samoa, o na o lo o tuuina mai i masina taitasi a latou puletini o lo o aumai ai latou results o latou sailiiliga po o latou faamaopoopoina o fuainumera o masina taitasi o tulaga uma faapea, pei o tagata tafafao maimoa mai Samoa, tagata o lo o ulufale mai i le atunuu faapea foi survey eseese o lo o faatino e i latou. O lo o i ai lava le tulaga faapena, ae sao le saunoaga a le sui usufono mamalu pei ona laga mai lea mataupu, e taua le i ai o le Tulafono Tau Faaofi e faamalosia ai le saga galulue faatasi ina ia maopoopo ma sao fuainumera o lo o faapena ona aoina mai pe tusia i lalo.

O tulaga i le filifiliina o mea ia sa taua o ACEO, o lo o i ai lava faiga faavae a le Malo, e moni lava o lea e taoto i Matagaluega ae taua lava le mulimulitaia o faiga faavae a tagata faigaluega a le Malo. O le tali atu lea lau Afioga i le Fofoga Fetalai.

**Tofa LEALAIPEPULU RIMONI AIAFI:** Lau Afioga i le Fofoga Fetalai o lea e fia malamalama i le vaega mulimuli lea e saunoa i ai le Sui Palemia ona o lea e manino mai i le Tulafono Tau Faaofi le filifiliga lea o le ACEO o le Matagaluega. O lona uiga la e le faaogaina lea vaega o le Tulafono Tau Faaofi, pe afai o lea o le a faaoga pea le Tulafono a le PSC, o le a le mafuaaga ua taatia ai i le Tulafono, o le Principal Act lea ua aumai ai o lea e manino le Tulafono e filifilia e le Government Statistician ia avanoa nei, tagata faigaluega nei, amata mai i le ACEO faasolo mai i lalo i isi Matagaluega. O lea e avatu lau lagolago pe a faapea o le tulaga lena e i ai, e tatau ona i ai uma Matagaluega a le Malo. Ae afai o lea e faapea mai e tatau ona mulimulitaia pea le Tulafono a le PSC o la la ua i ai le feteenaiga ma le Tulafono aua o le Tulafono Tau Faaofi lea e patino tonu i le Matagaluega.

**FOFOGA FETALAI:** O lea ua maua le finagalo o le sui usufono, manatu foi o lea e lei see le tatou Tulafono Tau Faaofi i le Komiti, o le a i ai le atoaga o lea o le a molimolitaia le tulaga o le atugaluga o le sui mamalu o lea e faafofoga mai le Taitaifono ona tele lava lea o le soalaupulega o lea mataupu.

Sei tulai mai pea le Afioga i le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, e pei ona ou fai atu o lea e aumai lava e le Tulafono Tau Faaofi le tulaga lea e pei ona manino ona aumai, a o le faatinoga la o la e i ai faiga faavae a le Malo ia e faatino ai filifiliga, faasalalaua, filifiliina o tulaga faapea i tulaga eseese, o la lava ua mautu tatou faiga faavae.

*Na faamaonia le lafo ma faitauina le Tulafono Tau Faaofi o Fuainumera Faamauina 2014 i lona faitauga faalua.*

**FOFOGA FETALAI:** E tusa ai ma le Tulafono Tumau o le a tuuina atu le Tulafono Tau Faaofi lenei i le Komiti o Faafoga Tau Pulega a le Malo i le iloiloia o manatu na finagalo i ai le Maota Fono i lenei taeao, aemaise o nisi o finagalo toe faaalua ona toe lipoti mai lea i le Fono Aoaio ia Iuni 2014.

## ILOILOGA O LIPOTI A KOMITI FILIFILIA

### **P.P.2012/2013 NU.87, LIPOTI A LE KOMITI O GALUEGA FEALUAIGA MA LE SIOSIOMAGA I LE P.P. 2011/2012 NU. 61, FAAMATALAGA O SINI AUTU O LE FUAFUAGA AUTASI A LE PULEGA O LE SUAVAI MO LE VAITAIMI 2010-2014 - ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Galuega, Fealuaiga ma Siosiomaga.

**Tofa TUSA MISI TUPUOLA (Taitaifono Komiti o Galuega, Felauaiga ma Siosiomaga):** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO. Faaluaina e le sui usufono mo Palauli.*

**FOFOGA FETALAI:** Tulai mai lau Afioga i le Taitaifono e faalauiloaina a outou Fautuaga ma Iugafono.

**Tofa TUSA MISI TUPUOLA:** Lau Afioga o Fautuaga nei a le Komiti i le maea ai o ana iloiloga e fautua ai le tatou Malo.

#### **“FAUTUAGA:**

I le maea ai o ana iloiloga e fautuaina e le Komiti le Malo ina ia:-

- 1. Fautuaina le faanatinati o le fesootai atu o alapaipa o tane o faleletaua o le Maota o le Malo i Matagalalua ma le Maota o le Matagaluega o Faamasinoga ma Pulega Tau Faamasinoga i le nofoaga o lo o vaimama ai le suavai lafoai i Sogi, ina ia foia ai le faafitauli o tane o ia faleletaua ina ia ogatasi ma aiaiga faava o Malo o le siosiomaga.**
- 2. Manaomia le galulue faatasi o le Matagaluega o Tupe ma le Pulega o le Suavai mo le vave faatinoina o isi poloketi ina ia vave maua se suavai mo afioaga o lo o manaomia le suavai.**
- 3. Ia vave faapipii se masini fou (new voltage regulator) i le pou moli o lo o tu lata ane i Falealupo, e faatonutonu ai le fesuisui ai o le malosi o le eletise e faaoga e lea pamuvai. O le vave faapipii o lea masini o le a mafai ona puipuia mai lea pamuvai taugata mai le faaleagaina ona o le fesuisui ai o le malosi o le eletise e mafai ai ona faasaoina mai ai nisi vaegatupe a le Malo e toe faatauina mai o isi pamuvai pe a faaleagaina le pamuvai fou taugata o lo o i ai nei.**
- 4. Fautuaina malosi le ave o le faamuamua o le Pulega o le Suavai i le fausia o nisi faatanoa vai fou faaopoopo mo le teuina ai o le**



suavai i vaega o le auaunaga o le tamaoaiga i le suavai, aemaise lava i Fuluasou, ina ia foia ai faafitauli o le tau faasoosoa o le suavai mai vaitau mugala.

5. Fautuaina pulega o le suavai ina ia faatinoina loa le fesuaiga o paipa PVC i le isi ituaiga paipa fou o le Poly E. Pipe, ona e umi lona aoga ma mafai ona faaititia ai le suavai maimau mafua mai ona o paipa papa e pei ona maitauina e le komiti ua oo atu i le 70% o le suavai maimau e afua mai i paipa papa.
6. Faamalositia le galulue faatasi o le Pulega o le Suavai ma le Matagaluega o Punaoa Faalenatura ma Siosiomaga mo le faasaoina o Eleele o lo o Pueina ai le suavai ina ia mautinoa le lava o le suavai e tua i ai le auaunaga, ona na matauina e le komiti le tau faasoosoa o le suavai i vaitau mugala.
7. Silasila le pulega o suavai i le tataua ona toe faaleleia uma Pamuvai tuai o Vai vili o lo o i ai i le taimi nei i Upolu ma Savaii.”

**FOFOGA FETALAI:** E momoli atu le agaga faafetai tele i le folasaga manino a lau Afioga i le Taitaifono o le Komiti o Galuega, Felauaiga ma Siosiomaga. Ma e manatu ua faafofoga ma le manino le tatou Maota. O le faataunuaina o le Lipoti lenei ma le tautinoga i lenei taeao o lea ua outou silasila i lumamaota o le Maota Fono i le aso lenei, o lea ua faagasolo mai le galuega tele lenei o le sewerage e agai uma i ai le faafitauli tele lea e tulai i le Tofilau Eti Alesana o le faaletonu o le tulaga i le vai lafoai. E faapena foi le faafitauli tele o lo o tupu i le ofisa o Faamasinoga, o lea ua taunuu mai le Lipoti ma le Fautuaga a o lea foi ua taunuu ma le faatinoga i le taeao lenei, o lo o i ai alii papalagi pe toasefulu ma ona tupu la e faigaluega i fafo i le taimi lenei, o lo o amata mai i lumafale mai lava i le falelafoai i Sogi seia oo mai i le Matagaluega o Faamasinoga. O le tautinoga lena ma nisi o fautuaga taua ua tuuina mai e le Komiti ma o le agaga lena ou te talitonu ua manino ma malamalama le Maota i le faatinoga, ua sagatonu le taunuu mai o le lipoti ma o lea ua alu le faatinoga o le galuega. A o le taimi lenei o le tatou avanoa, pe i ai se isi e fia saunoa, a leai, ia o le a tuu atu le fesili e talia aloaia le Lipoti a le Komiti, o lea ua faagasolo ia galuega faatino a le tatou Komiti.

Ia tulai mai le Tuiatua Faanofonofo, le sui usufono mo Aleipata Itupa i Lalo.

**Afioga TAFUA MALUELUE TAFUA (Aleipata Itupa i Lalo):** Faafetai i lau Afioga i le Fofoga Fetalai, e momoli atu foi le agaga faafetai i le Afioga i le Taitaifono aemaise o le Komiti mamalu e tusa ma le Lipoti auiliili ua saunoa i ai aumai se fautuaga.

E tulai atu ma le agaga faaaloalo e tasi lava lau fesili, pe ua gafatia e le tatou Waste Water Treatment Plant lea i Sogi le faagasolo atu o le suavai lafoai iinei i le Ofisa o le Fono faapea foi le Matagaluega o Faamasinoga, ma le faaaloalo.

**FOFOGA FETALAI:** Ia tulai mai le sui usufono mamalu mo Faleata Sasae.

**Tofa AVEAU TUALA LEPALE NIKO PALAMO:** Masalo o lea ua saunoa le Afioga i le Tuiatua i le fesili, e tasi lea fesili taua ae pe gafatia, aua pei ona silafia a oo i taimi foi ia ua lolovaia, ia e maitauina lava le overflow o i i le vaega lea.

O le vaega lona lua, po o tagai la outou Komiti i se faamama avega i kamupani foi ia i le totogiina o le service lea, aua pei lava ona silafia, e fai lava sina taugata o lea vaega i totonu o le taulaga aemaise lava i le aufaipisinisi?

Ae o le isi foi au fesili atu i lau Afioga, po o ua mafai ona outou galulue faatasi ma le SROS i le maitauina o le vai lea e mama lea e toe faaalu agai i i le gataifale ona pei ona silafia, e afaina ai le tele o le itumalo lea o matou. Ae po o le a se mea ua oo i ai ia lea foi vaega pei ona talosagaina i Fonotaga ua tuanai i le faamamaina o le suavai lea, pe mafai ona aumai sa outou tali mautu i lea vaega, ina ia le afaina ai le gataifale aemaise foi ia figota e pei ona tua i ai lenei itumalo? Ma le faaaloalo lava.

**FOFOGA FETALAI:** Malo. Ia tulai maia lau Afioga i le Taitaifono, e na o le lua finagalo ia na faalia.

**Tofa Tusa Misi Tupuola:** Lau Afioga i le Fofoga Fetalai ou te tali atu i le faafesili a le Afioga i le Tuiatua Faanofonofu, o lo o sologa lelei lava le tulaga o taualumaga o galuega ia o le vai lafoai lea, mai lava i le taimi na amata mai ai e oo mai i le aso, ia o lea foi ua e silasila o lo o ua faagasolo le latou galuega ma o lo o tele foi nai a latou fesoasoani mai fafo o lo o faamoemoe i ai le faatinoga o le vai lafoai.

I le tulaga o le vai lea o lo o saunoa i ai le sui usufono mamalu mo Faleata Sasae, ia e leai o lea lava o lo o lelei lava le suavai lau Afioga i le sui usufono mamalu. O tulaga uma o suesuega ma sailiiliga a le SROS, o lo o tumau pea le lelei o le vaitaumafa o lo outou itumalo. Pei o lau tali atu lea i le tulaga o le faafesili mai, ae o lo o lelei pea le faagasologa o galuega o le suavai ma le Pulega o le Suavai, pei lava ona silafia e lau Afioga ma le mamalu o le Palemene, e le tasi se itumalo e agai i ai le galuega a le suavai, e tele naua, ma o le tele foi o a latou galuega, e i ai lava isi taimi e mafai ai ona misi se isi galuega, a o le agaga o le Pulega, ina ia taumamafa lo tatou atunuu i se vaimama, se vai lelei e maua i taimi uma. Ma le faaaloalo.

**FOFOGA FETALAI:** Ia e tuu atu le avanoa i le Afioga i le Minisita mo Galuega, Felauaiga ma Atinae Esee.

**Afioga Hon Manualesagalala Enokati Posala:** Lau Afioga i le Fofoga Fetalai, na ona ou faaopoopo atu e tusa ma le saunoaga a le Taitaifono, o vaega ia e manatua foi o nei galuega tetele faapenei, ia e mautu ia suesuega sa faavae ai, ma e leai se mea e faapopoleina ai o lea foi sa fai suesuega ua uma ona faataunuu le phase muamua, o la ua...a o lea ua agai mai nei ona o lea e gafatia e le tatou Treatment Plant lea e i i i Sogi.

O le isi vaega pei ona laga i le tulaga lea, o kamupani foi ia e omai e faatino galuega, e le o i ai se gafatia e tatou nei, o kamupani mai fafo ia o lea e mafai ona faataunuuina galuega lenei.

O le tulaga i le tau pei ona aumai ai le finagalo, po o le lua tausaga e lei totogia kamupani uma ia sa fesootai ai le auaunaga lea. O lona uiga o se tasi

lea o laasaga taua, ua leva foi ona sausaunoa i ai sui usufono, ia ona sau laia o le tausaga lea na tea nei na toe sui ai, sa i ai le tau sa faatulaga mai ia toe fetuunai i le review i le 2012, 2013, o la foi ua toe pau i lalo, ia o le taimi lenei o la ua agai ia kamupani ia ma aiga uma ia o...kamupani, ia ma le Malo o lo o faaaogaina, e totogi le tau lea ua sili ona pau i lalo le tulaga lea e i ai. E agai lava le Pulega o le Suavai e vaavaai tulaga uma, ina ia mafai ona gafatia, ae ia ausia foi tulaga mama ma tulaga o lo o faatino ai ia galuega. E pei o lo o faaauau foi ia le tulaga o test ia e monitor ai le vai lea e discharge, aua o le process o le mea lea, ia o le tele lea e lau e solid, e i ai le solid waste, ia o lea e lau agai i Tafaigata, ae laitiiti lava sina vaega o le suavai lea o lo o treat, o lea e discharge agai i tai ma o lo o faaauau pea ia sailiiliga ma suesuega faifaipea, ina ia aua ne i afaina ai lo tatou siosiomaga. A o le tulaga lautele lava ia o le auunaga a le suavai, ia o lena ua taumafai lava i se tulaga lelei ina ia mama ma ia faaauau pea, o galuega e faaauau pea ona mataitu ia ma faaauau ia tulaga o le faaleleia ma galuega e pei ona fuafuaina e le Pulega o le Suavai. Ma le agaga faaaloalo.

**FOFOGA FETALAI:** Malo faafetai. E manatu ua manino ma malamalama. Le sui usufono mo Aana Alofi Nu. 3, e i ai se mea sa e.....?

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai leai na ona faaopopo atu ona o au o le sui o le matou Komiti e fesoasoani atu i le Afioga i le Taitaifono, a o lea ua maitau atu o lea ua faamalalama e le Afioga i le Minisita le tele o vaega, faafetai.

**FOFOGA FETALAI:** Malo, faafetai fesoasoani mai.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

Ou te manatu o lea ua tatou tanuu i le tatou taimi malolo i lenei vaega o le aso. E i ai le agaga ma le faamoemoe, e momoli atu le faafetai ona o le tauavagameaina o le tatou Fonotaga i lenei aso. E talitonu foi o lea ua faataatia le alafua e ala i le tatou polokalame ua faataatiaina mo lenei vaiaso ma le tatou Fonotaga.

E pei lava ona ou faatalauula atu i le futia ua sola ma taimi ua alu i le taeao aena, o lea ua fonu i le uluai aso muamua o le vaiaso, ma e talitonu, ia o le tatou sailiga malosi ina ia maua le faaauauina o le malosi atoatoa e faaauau ai le tatou galuega mo lenei vaiaso atoa, o lea ua tatou amata muamua i le tatou Lipoti lenei e 70 ma ona tupu a tatou Lipoti, o lona uiga o le aso muamua lenei o le vaiaso ua manatu ai, e tataua ona fetuunai i tulaga e le gata o le Maota, a o le tulaga foi i le va faafeagai ai i lau Afioga i le Sui Palemia ia ma le Kapeneta. E manatu foi ua le toe po malae i nisi o tulaga sa tatou le manatu po o tulaga le maalofia ua tatou le faatasi ai ma le Taitai o le atunuu, ia o le a lafo atu le taimi lenei ona o fetuunaiga o galuega i le faasoasoina o lo outou taimi, ona o lea sa faatu le tatou lafo e ala i le tatou Fono po. Ae ua manatu ai, ia e tatou te vaai i tulaga uma i fuafuaga ina ia talafeagai mea foi ua tulai mai

sa tatou le maitauina, ia ma le faatulagana o tatou galuega ma saili lo tatou malosi.

O lona uiga, o le a tatou malolo ma tuuina atu pea le Fautuaga i le Malo ina ia ua lava le ao o le aso lenei tatou te Fono ai, ae faataatia le aoauli ma tatou sailiili malosi mo nanei i le afiafi, ia ona toe tilotilo lea i aga a taeao ma faamoemoega i le saosasoa e agai i ai le talanoaina o Lipoti taitasi, ia ona faapena ai lea ona tatou toe fetuunai ia ma tuu le tulaga talafeagai ina ia mafai ona soalaupule ai mataupu, a o le faamoemoega lava ia, ia oo atu i le afiafi o le Aso Faraile nei, ia ua maea uma Lipoti nei e 70 ma ona tupu.

O le agaga lena ma le faatalaauula a le Fofoga Fetalai e faafaigofie ai a tatou polokalame, ina ia tuu atu foi i o outou aao, ae ua outou silafia Lipoti ua manino. Ia e le tataua ona toe faia se tulaga aua o lea e toe tali mai foi le Malo ma tele le taimi e soalaupule ai lo tatou Maota.

Ma le isi itu lona lua, ia ua outou silafia o lea e pesi le tatou faamai fofoga o lea e aafia tele ai lo tatou atunuu. O lona uiga, e fautua atu pea ina ia sili le puipuia i lo le tau togafitia, ia ae maua le avanoa ma le malosi e faaauau ai le tatou Fonotaga.

O lea ua ou manatu ai, o le a tuu atu i le Afioga i le Sui Palemia mo se lafo faatu e vavae ai foe mo le tatou uluai aso muamua lenei, ona tatou toe mataitu lea i le aso a taeao e faatino ai ma faaauau le tatou galuega.

Tulai mai lau Afioga i le Sui Palemia.

#### **LAFO MO LE SUIA O ITULA FONO (T.T.31(1))**

**Tofa Hon FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai, ua faamalo le galulue i lenei foi taeao. O lea ua maitau atu ua 11 Tulafono na tagofia e le Maota i lenei taeao faapea ma le Lipoti e 1, o lea e fai sina tele o tatou Lipoti masalo pe 70 Lipoti o lo o totoe i luga o le tatou Pepa o Galuega o lo o faagasolo nei. Ia pei o le tulaga lea lau Afioga i le Fofoga Fetalai ua ou tulai atu e faatu le lafo, *Ina ia toe faafoi itula Fono i itula masani o le 9:00 i le taeao seia paia le 1:00 i le aoauli e pei ona aiaia i le Tulafono Tumau e 31(1).*

*Faaluaina e le Minisita o Tupe.*

*Na faamaonia le lafo toe foi ai itula fono i itula ua faatulagaina i le Tulafono Tumau 31(1).*

**FOFOGA FETALAI:** A o le i faaiuina le Fonotaga i lenei aso, ou te valaau atu i lau Afioga i le Tamaitai Minisita Lagolago, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow e te tulai mai e fai se tatou tatalo faaiu ona tatou malolo ai lea mo lenei aso.

*Na tolopo Taulumaga a le Fono Aoa o le itula e 1:00 i le aoauli seia aulia le itula e 9:00 i le taeao o le Aso Lua, 25 Mati 2014.*